

বেণু ও বীণা

BANGLADARSHAN.COM
সত্যেন্দ্রনাথ দত্ত

বেণু ও বীণা

আরম্ভে

বাতাসে যে ব্যথা যেতেছিল ভেসে, ভেসে,
যে বেদনা ছিল বনের বুকেরি মাঝে,
লুকানো যা' ছিল অগাধ অতল দেশে,
তারে ভাষা দিতে বেণু সে ফুকরি বাজে!

মূকের স্বপনে মুখর করিতে চায়,
ভিখারী আতুরে দিতে চায় ভালবাসা,
পুলক-প্লাবনে পরাণ ভাসাবে, হায়,
এমনি কামনা-এতখানি তার আশা!

হৃদয়ে যে সুর গুমরি মরিতেছিল,
যে রাগিণী কভু ফুটেনি কণ্ঠে-গানে,
শিহরি, মূরছি,-সেকি আজ ধরা দিল,-
কাঁপিয়া, দুলিয়া, বঙ্করে,-বীণাতানে?

বিপুল সুখের আকুল অশ্রুধারা,-
মর্ম্মতলের মর্ম্মরময়ী ভাষা,-
ধ্বনিয়া তুলিবে-স্পন্দনে হ'য়ে হারা,
এমনি কামনা-এতখানি তার আশা!

কতদিন হ'ল বেজেছে ব্যাকুল বেণু,
মানসের জলে বেজেছে বিভোল বীণা,
তারি মূর্ছনা-তারি সুর রেণু, রেণু,-
আকাশে বাতাসে ফিরিছে আলয়হীনা!

পরাণ আমার শুনেছে সে মধু বাণী,
ধরিবারে তাই চাহে সে তাহারে গানে,
হে মানসী-দেবী! হে মোর রাগিণী-রাণী
সে কি ফুটিবে না 'বেণু ও বীণা'র তানে?

BANGLADARSHAN.COM

অনিন্দিতা

ধূলিরে সুন্দর করি এস তুমি হে সুন্দরী
ধূপা পায়ে এস অনিন্দিতা!
পক্ষ্ম-পাখে, আঁখি-পাখী, চাঁদের অমিয়া ছাঁকি'
ঢেলে দিক, হে কবি-বন্দিতা!
অধর-কপোলময় ফুলের মিলেছে লয়,
সু-ললাট মতির আবাস,
সৌন্দর্যের ধারা-বৃষ্টি, বিধির অপূর্ব সৃষ্টি,
কালিন্দীর্ উর্ষি কেশপাশ।
ফুলের রচিত দেহ, স্নেহ করুণার গেহ-
লয়ে এস-পরাণ উদার;
অপূর্ব অমৃত-রসে, সিনান করাও এসে,
জ্যোৎস্না-ঘন পরশে তোমার!
আনগো মঙ্গল-ঘট, লয়ে এস অকপট
বেদনা-বুঝিতে-পটু মন,
দু'খানি স্নেহের করে জগতেরে রাখ ধরে,
রাখ বেঁধে অন্তরে আপন।
এস, মন্দ-বায়ু-গতি! সৌন্দর্য্য-রূপিণী সতী!
শোন মোর সৌন্দর্যের গীতা;
মনের দুয়ার খুলি, একবার পথ ভুলি,
এস দেবী-এস অনিন্দিতা!

BANGLADARSHAN.COM

কিশলয়ের জনুকথা

চোখ দিয়ে ব'সে আছি কখন অঙ্কুর ফাটি'
বাহিরিবে প্রথম পল্লব;
একমনে আছি চেয়ে, ধরা যদি পড়ে তাহে—
নিখিলের আদি কথা সব।

সারাদিন ব'সে, ব'সে, তন্দ্রা চোখে এল শেষে;
চরাচর ডুবিল তিমিরে;
প্রভাতে দেখিনু জেগে, নয়নে কিরণ লেগে—
কচি পাতা কাঁপিছে সমীরে।

BANGLADARSHAN.COM

রূপ-জ্ঞান

জ্যৈষ্ঠ মাস-বৃষ্টি হ'য়ে গেছে
আহ্লাদে আকুলা ভাগীরথী;
স্নিগ্ধ বাতে ত্রিলোক তুষিছে,
কৃষ্ণ যেন সেবিছে অতিথি।

লালে লাল পশ্চিম আকাশ,-
তপ্ত সোনা-সিন্দূরে-হিসুলে,
অঙ্গে ধরি রক্ত চীনবাস,
জাহ্নবী, চলেছে এলোচুলে!

লাক্ষ্যরাগে রঞ্জিত আকাশে
খণ্ড নীল দূর্বাদল-শ্যাম,
প্রলয়ের রক্তে যেন ভাসে

বটের পল্লব অভিরাম,-

ছায়া তার রক্তিম গঙ্গায়,-
দেখ চেয়ে-দিব্য কাম্য-কূপ,
রূপহীনা, কে আছিস্ আয়-
এ ঘাটে নাহিলে হয় রূপ!

BANGLADARSHAN.COM

মাঙ্গলিক

(খাম্বাজ)

পরমেশ! আজি, বরিষ তোমার
আশিষ যুগল শিরে;
কর পবিত্র, পুষ্পেরি মত,
এ নব দম্পতীরে।
আজি হ'তে তা'রা বাহিবে তরণী,
অকূল সিন্ধু-নীরে;—
হরষিত শত হৃদয় প্লাবিয়া
আজি যে পুলক ফিরে,—
সে মধুর প্রীতি যেন দিবা রাত্তি
যুগলে রহে গো ঘিরে।

BANGLADARSHAN.COM

প্রেম ও পরিণয়

সুখের নিলয়— সেই পরিণয়,—

প্রণয় যাহে দৃষ্টি রাখে;

নইলে কেবল লোহার শিকল,

জীবন-পথে বিঘ্ন ডাকে।

চন্দ্র তারায় সন্ধি ক'রে

দু'টি হৃদয় বন্দী করে,

কত যুগযুগান্ত ধ'রে

আয়োজন তার চলতে থাকে।

একটি নারী, একটি নরে,

অপূর্ণে অখণ্ড করে,

প্রাচীন ধরায় তরণ করে,—

অরণ-রাগে জগৎ আঁকে!

অমৃত প্রেম মর্ত্যলোকে,

অমৃত সে দুঃখ শোকে;

জীবন-পুঁথির জটিল লেখা—

স্পষ্ট হয় প্রেমিকের চোখে।

পরিণয়ে সেই সে প্রণয়,

পরিণত যেই দিনে হয়,

সে দিন ফলে অমৃত-ফল—

জগৎ-বিষ-বৃক্ষ-শাখে।

BANGLADARSHAN.COM

জ্যোৎস্নালোকে

তুমি গো আছ মগন ঘুমে
 ফুলের বিছানা’;
জানলা দিয়ে পড়িছে গিয়ে
 আকুল জোছনা।
এই সে ছিল চরণ ছুঁয়ে,
একটি কোণে, একটু নুয়ে,
এখন সে যে হিয়ায় রাজে,
 হরিণ-লোচনা!
সাহস পেয়ে, রয়েছে চেয়ে,
 অধীর জোছনা!

সন্ধ্যা থেকে আমার চোখে
 ঘুমের নাহি লেশ;
জ্যোৎস্নালোকে তোমায় দেখে
 সুখের নাহি শেষ!
আমার ছায়া তোমার বুকে,
জ্যোৎস্না সাথে ঘুমায় সুখে,
জ্যোৎস্না সাথে নয়ন পাতে
 রচিছে মায়া দেশ।

সন্ধ্যা থেকে আমার চোখে
 ঘুমের নাহি লেশ।

জ্যোৎস্নাটুকু মিলায়, বায়ু
 দোলায় কেশ-পাশ,
এখনি তবে প্রভাত হবে,
 জাগিবে রশ্মি-ভাস্।
ছিলনা বাধা, হরষ মনে,
চাহিয়া ছিনু তোমার পানে,
বিজন গেহ ছিলনা কেহ
 করিতে পরিহাস;

BANGLADARSHAN.COM

জ্যোৎস্নাটুকু মিলায়, বায়ু
দোলায় কেশ-পাশ।

সফল আমি জীবন মম,
সফল জোছনা,

সফল তব রূপের রাশি
কমল-লোচনা!

ধৌত করি তারার মালে,

ধৌত করি যুথির জালে,

পড়েছে ঝ'রে তোমারি' পরে
অমর জোছনা।

জ্যোৎস্না দেশে, রাণীর বেশে,
হরিণ-লোচনা!

BANGLADARSHAN.COM

স্পর্শমণি

কহিতে কাহিনী আছে, গাহিবারও আছে গান
যত দিন মনোবীণে ভালবাসা তুলে তান!
মলয় চলিয়া গেলে ফুল ত' ফুটে না বনে,
ভালবাসা ফুরাইলে সাড়া ত' উঠে না মনে;
দেবতা চলিয়া গেলে, দেউলে না দীপ জ্বলে,
ভুলেও না উঠে তান—প্রেম যেথা অবসান।
ভালবাসা যদি, হয়, বারেক ফিরিয়া চায়,—
অরণ্য চরণ দিয়া—হিয়া পরশিয়া যায়,—
ফুটে শত শতদল, ছুটে মধু পরিমল,
জেগে' উঠে কলগীতি—মন প্রাণ কানেকান!
গেয়ে না ফুরায় গান,—কথা হয় অফুরান্!

BANGLADARSHAN.COM

রূপ ও প্রেম

রূপ ত' হাতের লেখা, প্রেম সে রচনা;

রূপহীনা নহে প্রেমহীনা?

লেখার এ দোষে শুধু, স্পর্শিবেনা কাব্য মধু?

প্রেম-ব্যর্থ হবে রূপ বিনা?

কবি হ'তে শ্রেষ্ঠ কি গো কেরাণী মুহুরী?

প্রেম হ'তে রূপের মাধুরী?

কুরূপে-নয়ন বিনা কেহ ত' করে না ঘৃণা,

প্রেম যা'র হৃদয় যে তা'রি।

চাঁদের কিরণ সেও চুমে তার গায়,

মলয়া সে কুন্তল দোলায়,

যৌবন-দেবতা করে রাজ্য-সে দেহের' পরে,

মনে প্রাণে বহে প্রেম-বায়!

তবে ফিরায়োনা আঁখি কুরূপ বলিয়া,

যেয়োনা গো চরণে দলিয়া,

নিশির স্নেহের গেহে, দেখো, রূপহীন দেহে,

প্রেমে রূপ উঠে উথলিয়া!

BANGLADARSHAN.COM

মেঘের কাহিনী

সম্বর হৃদে, জর্জর দেহে, ঘুমায়ে আছি নি ভাই,
লবণে জড়িত লহরের কোলে ঘুমেও স্বস্তি নাই;
সহসা পূরবে, তরুণ অরুণ হাসিয়া দিলেন দেখা,
আমি জাগিলাম, বুকে দেখিলাম অরুণ-কিরণ লেখা!

কিরণাঙ্গুলি ধরি’

আমি, উঠিলাম তুরা করি’,
কম্পিত, ক্ষীণ, জর্জর তনু-ললাটে বহি-শিখা।

তৃণ পল্লবে, নিম্ন বায়ুতে আপনার জ্বালা ঢালি’
উচ্চ গিরির উন্নত চূড়ে উঠিতে লাগি নি খালি;
কঠোর শিলার পরশে আমার নয়নে ঝরিল জল,
ছল ছল চোখে লাগি নি উঠিতে-ছুঁই নি গগনতল।

ডুবিলেন দিননাথ,

হাসি, পবন ধরিল হাত;
তুষারের মত হ’য়ে গেল দেহ, ফুরা’ল সকল বন।

* * * *

বাতাসের সাথে ধরি হাতে হাতে গগনে ছুটি নি কত,
পলে পলে ধরি অভিনব রূপ-খেলি বাতাসেরি মত;
চন্দ্রমা আর গ্রহ তারকার সকল বরতা লয়ে’-
বরষের পথ মনের আবেগে নিমেষে চলি নি ধৈয়ে;

কত যে হেরি নি, আহা,

কভু, স্বপনে ভাবি নি যাহা।

ডাকে মোরে দূর চাতক, ময়ূর, কবি-গান গেয়ে গেয়ে!

বিশ্বের ডাক শুনেছি আবার-হৃদয় ভ’রেছে স্নেহে,
বিশ্বের প্রেমে পরাণ আমার ধরেনা ক্ষুদ্র দেহে;
বুকে ধরি খর বিজলীর জ্বালা বুঝেছি আপনি জ্বলে’
ধরণীর জ্বালা, তাই ত’ আবার চলিয়াছি মহীতলে।

মরুতে যে বায়ু ব’য়-

আর, করিনা তাহারে ভয়;
রঙীন মেখলা পরিয়া চলেছি আশা দিতে ফুলদলে।

আমারি মতন কত শত মেঘ জুটেছে আজিকে হেথা,
কাজলের মত বরণ, গাহিছে জীমূত-মন্দ্র-গাথা।
চলিতে দুলিছে শত গোস্তুন, পূর্ণ শীতল রসে,
বেদনা তাপিত আবেশে ঘুমায়, কবরীবন্ধ খসে;

টুটে কতচূড় জটা,
তাহে, ফুটে দামিনীর ছটা,
কুস্তল ভার-আকুল ধরার চোখে মুখে পড়ে এসে।

ঝর্ঝর রবে ঝরে বারিধার, শিথিলিত কেশ, বেশ;
গর্জন ধ্বনি সহসা উঠিল ব্যাপিয়া সর্বদেশ।
এ পারে বজ্র অটু হাসিল, ও পারে প্রতিধ্বনি,-
সংজ্ঞা হারা'নু, কি যে হ'ল পরে আর কিছু নাহি জানি।

জাগিনু যখন শেষ,
দেখি, আছি আমি ব্যাপি' দেশ,
ভূতলে অতলে যেতেছে মিলায়ে আমারি সে তনুখানি!

আজ নাহি মোর জোছনা সিনান, কিরণে শিঙার নাই,
নাহি রামধনু-মেখলা আমার, নাই কিছু নাই, ভাই;
আজ আমি শুধু সলিল-বিন্দু, ভাই আজি মোর ধূলি,
চাঁদের মিতালি ভোলা যায়, করি' তার সাথে কোলাকুলি!

আমি, নহি নহি মেঘ আর,
এবে, জল আমি পিপাসার,
সার্থক আজি জন্ম আমার-যুথিরে ফুটায়ে তুলি।

বর্ষায়

শ্লথ, পরিণত— কদম কেশর
ঝরিছে এ পাশে ও পাশে;
মৃদু-বিকশিত কেতকীর রেণু
ক্ষরিছে বাতাসে বাতাসে।
মেঘ আসে যায় বারেবারে,
ঝরে বারিধারা, কদম কেশর,
মিলে মিশে একাকার।

বহুদিন পরে চলিয়াছি গ্রামে,
নূতন হয়েছে পুরাণো।
চোখের উপরে বেড়ে ওঠে ধান,—
দায় হ'ল আঁখি ফিরানো।

নাচে বুলবুলি আর ফিঙে,
জাল ফেলে ফেলে জেলের ছেলেরা
বেয়ে নিয়ে চলে ডিঙে।

ধীরে মছুরে গ্রামের ধরণে
চলেছে গ্রামের লোকেরা,
অলস গমনে জল বহে বধু,
মেঘে মিশে যায় বকেরা।
কা'রে নাম ধ'রে ডাকে দূরে,
দূর হ'তে তার ফিরে আসে সাড়া
মাঠে মাঠে ঘুরে ঘুরে।

গাভী সাথে লয়ে একা পথ দিয়ে
চলেছে চাম্বার ঝিয়ারী,
নূতন বয়স, সরস শরীর,
চাহনি নূতন তাহারি;
তা'রে এ দিঠি শিখা'ল কে গো?

BANGLADARSHAN.COM

বয়সের রীতি কে শিখায় নীতি
এ বিজনে, ব'লে দে গো!

সে যে অপরূপ বরষার মত,—
আপনি উঠে গো ভরিয়া,

সে যে সচকিত দামিনীর মত
প্রাণ আগে লয় হরিয়া!

সে যে ধানের ক্ষেতেরি মত, —
চোখের উপরে বাড়ে পলে পলে
চেউ উঠে শত শত।

সাথে গাভী লয়ে পশিল কুটীরে
কিশোরী চাষার ঝিয়ারী,
পুলকে অমনি উঠিল ডাকিয়া
কুকুর—তাহার দুয়ারী!

হেথা জল নেমে এল হেনে,
বাদলের ধারা বাদ সাধিল রে
চিকের পর্দা টেনে!

BANGLADARSHAN.COM

সারিকার প্রতি

সারিকা! কোথারে আজি-সাগরিকা-কোথা আজ,
আঁকিছে কাহার ছবি, বলিতে কেনলো লাজ?

সে দিন লুকায়ে রহি,

গেছিলি সকলি কহি,

আজিরে নীরব কেন-বনবীণা বাজ, বাজ।

আজিও তেমনি কিরে, কদলীর ছায়ে রহি,

তপনের-মদনের-তনু মনে জ্বালা সহি,

শীতল কদলী ছায়

শয়ান রচিয়া হয়,

বিভোরে আছে কি বসি সে আমার পথ চাহি?

আজো কি আমার ছবি-ফেলিয়া সকল কাজ-

আঁকিছে গোপনে, বালা, মলিন নলিন সাজ?

আজো কি হৃদয়'পরে-

আমার মূর্তি ধরে?

আজো কি তাহার মনে লীলা করে ঋতুরাজ!

BANGLADARSHAN.COM

আকুল আহ্বান

এস নাথ! এস নাথ! এস নাথ!

বসন্ত প্রভাত! সুখ-বসন্ত প্রভাত!

কোকিল সে কুহু কুহরিল,

শিহরি উঠিল বন-বাত;

গুঞ্জরি' অলি বাহিরিল

বকুল গন্ধ সাথে সাথে!

এস নাথ! এস নাথ! এস নাথ!

বকুল ঝরিয়া মরিল গো,

চম্পকও হ'ল পরিম্লান;

মূর্ছিত তাপে শিরীষ গুচ্ছ,

তনুমন আজি ম্রিয়মাণ।

‘ফটিক জল’—‘ফটিক জল’—

চাকত ফুকারে সবিষাদ;

আমি লাজভীতে নারি ফুকারিতে,

এস নাথ! এস নাথ! এস নাথ!

নিদ্রিত পুরে বায়ু ‘হাহা’ করে,

ঘন বরষণে কাটে রাত,

কত যুথি ঝরে—কে গণনা করে?

হায় নাথ! হায় নাথ! হায় নাথ!

কদম কেতকী বনভূমি ছায়,

দাদুরী আঁধারে কাঁদে রে,

ফুল সম হিয়া ফুটিবারে চায়—

তারে কে আজিকে বাঁধে রে।

কেতকী মলিন, নীপ রূপহীন,

কমল খুলিল আঁখি-পাত;

জ্যোৎস্না হাসিল প্লাবিয়া ধরণী;—

এস নাথ! এস নাথ! এস নাথ!

উত্তরে হাওয়া ফিরিল গো,
উলুকী ফুকারে সারারাত;
তুমি তো এলে না-তবু, ফিরিলে না,-
হায় নাথ! হায় নাথ! হায় নাথ!

কুন্দ কাঁদিয়া দুখে, হায়,
ঝরিয়া মিশায় কুয়াসায়;
বিধবা কানন-বল্লরী, মরি,
মলিন আকাশপানে চায়।
দীর্ঘ যামিনী কাটেনা আর,
না মুদে হায় নয়ন-পাত;
ডাকে তক্ষক-বন-রক্ষক;
হায় নাথ! হায় নাথ! হায় নাথ!

BANGLADARSHAN.COM

অবসান

চ'লে যাও-ওগো, চ'লে যাও,-
বকুল ফুলেরে দ'লে যাও।
হেথায় ধূলির মাঝে
কে মুখ লুকা'ল লাজে,-
সে কথা শুনিতে কেন চাও?
আঁধারে ফুটিয়া সে যে
আঁধারে ঝরিয়া গেছে,
তার কথা-কেন গো সুধাও?
তাহার রূপের ভায়
তারা ত' ফুটেনি হয়,
বড় আশা?-ছিল না ত' তা'ও।
ঝরিয়া পথেরি ধারে
ছিল সে পড়িয়া, হা-রে
চরণে দলেছ-ভাল-যাও।
ধূলি-মাখা একাকার,
তার পানে বৃথা আর
আকুল নয়নে কেন চাও?
তা'রি সে শেষ নিশাস-
এখন' বহে বাতাস!
হেথা হ'তে-নিঠুর!-পালাও।

BANGLADARSHAN.COM

আলোকলতা

মূল নাই, ফুল ফল পত্র নাই মোর,
বাতাসে জনম মম, তরুশিরে বাস;
তন্তু সম সূক্ষ্ম তনু, সুবর্ণের ডোর,
যে মোরে আশ্রয় দেয় তা'রি সর্বনাশ।

চিনেছ? ‘আলোকলতা’ বলে মোরে লোকে;
যে মোরে আদরে শিরে ধরে আপনার—
নিস্তার নাহিক তার, বেড়ি পাকে, পাকে,
শ্রীহীন, লাভণ্যহীন, করি তনু তার,—

রস মরে, পত্র ঝরে, শরীর শুকায়,
আত্মহারা আলিঙ্গনে—তরু—এ তনুর,—
সমাচ্ছন্ন পরশের মোহ-মদিরায়;

প্রতিবাত্তে কাঁপে দেহ অসার তরুর।

শুকাইলে বৃক্ষ, আমি তবে সে শুকাই;

আলোকের ধন, পুনঃ, আলোকে লুকাই!

BANGLADARSHAN.COM

সান্ত্বনা

বিফল যদি হয় গো প্রণয়-বিফল হতে দাও;
সুখের পরে দুঃখ পেলে-আর কি পেতে চাও?
তোমার মনের আকুলতা
বুঝতে পারে তরলতা,
মানুষ যদি না বুঝে তা'-সইতে হবে তা'ও।
প্রেম দিয়েছ প্রেমের ধনী,
দিয়েছ ঋণ-হওনি ঋণী,
রিক্ত তবু মুক্ত তুমি-সেই পুলকেই গাও।
প্রণয় হারিয়েছিস ব'লে,
পড়িস্নে ভাই দুঃখে হেলে,
প্রেমের সঙ্গে প্রাণ যেতে চায়-তারেও যেতে দাও।

BANGLADARSHAN.COM

উদভ্রান্ত

আন বীণা, বাঁধ তার, ঢাল সুরা, গাহ গান;

যে গিয়েছে—কথা তার, কর আজি অবসান।

যে ফুল গিয়েছে ঝ'রে, সে আর ফিরিবে নারে,

যে পাখী মরেছে হয়—গিয়েছে সে চিরতরে;

মোছ তবে আঁখি-ধার—কাঁদিয়া কি হবে আর?

ঢাল সুরা—করি পান, তোল গো নূতন তান,

শ্লশানে জনম যার—তারো কেন কাঁদে প্রাণ!

আমার এ আঁখি দিয়ে অশ্রু বহে না গো,

এ প্রাণ আপন ব্যথা কারেও কহে না গো,

আমার বেদনা বুকে, এমন পাইনা খুঁজে,

এ জগতে যাতনার—পরিহাস—প্রতিদান!

পাষাণে পাষাণ হানি' তোল তবে কলতান!

বীণারে তুলিয়া লও, যত দিন আছে তার,—

তোমার ব্যথায় হয় কাঁদিবে সে শতবার,

কণ্ঠে মিলায়ে তান—গাহিবে করুণ গান,

তাহারে ধর গো বুকে—কর শোক অবসান;

তোল ফিরে কলগান, পাষাণে বাঁধিয়া প্রাণ!

BANGLADARSHAN.COM

ব্যর্থ

অতিথি ফিরিয়া গেছে,
আয়োজনে এখন কি ফল?
চাতক মরিয়া গেছে,
আজি আর মেঘে কেন জল;
গোলাপ ঝরিয়া গেছে,
ফিরে যা রে পবন পাগল।

টুটিয়াছে সুরার পেয়ালা,
শুষ্ক মাটি লয়েছে শুষ্কিয়া;
ভেঙেছে ত' ভেঙে যাক খেলা,
ঘরে পরে কি হ'বে দূষ্কিয়া
নিশিদিন পঞ্জর-পিঞ্জরে পুষিয়া?

যামিনী পোহায়ে যদি গেল—
এখন এ বৃথা অঙ্গ-রাগ;
নয়নের নেশা ত' ফুরা'ল,—
মিছে কেন কথার সোহাগ?
লিখে লিখে সাদা হ'ল কাল,
ছিঁড়ে ফেল,—চিহ্ন ঘুচে যাক।

BANGLADARSHAN.COM

ব্রষ্ট

আনন্দে অমৃত-গন্ধ আছিল তখন,
তীব্র ছিল দুঃখ অভিমান,
অনুভূতি তীক্ষ্ণ ছিল, পুষ্প সম মন,
ভালবাসা ছিলনাক' ভাণ।

তখন সে পরিচয় তোমায় আমায়,
কত দিন-কতদিন গেছে;
এত ঘনিষ্ঠতা,-শেষে কে জানিত হয়,
অজানার মত র'ব বেঁচে?

তুমি ডুবিয়াছ পক্ষে আমি সশঙ্কিত,
মজি নিজে-কখন-কে জানে;
পাছে এ কাহিনী হয় অন্যের বিদিত,-
ফিরে নাহি চাহি তোমা' পানে।
হয় ত' হ'তাম সুখী আমরা দুটিতে,-
হেলা ভরে তুমি গেলে চলি';
প্রেম-শতদল হয় ফুটিতে ফুটিতে-
মনে পড়ে?-গিয়েছিলে দলি'

মানুষ পাষণ্ড হয়, কর কি প্রত্যয়?
চেয়ে দেখ-সাক্ষী তার আমি;
ঠেকিয়া শিখেছি এবে, কেহ কার' নয়,-
সত্য কি না জানে অন্তর্যামী।

কেনা, বেচা, বেনেগিরি কানাকড়ি নিয়ে,
হট্টগোল হাটের মাঝারে;
ক্ষয়ে গেল সোনাটুকু যাচিয়ে, যাচিয়ে,
প্রতিদিন দোকানে, বাজারে,-
অধরে যে হাসি ছিল-মিশেছে অধরে,
জঙ্গলের ফুলের মতন;

নয়নে যে জ্যোতি ছিল, শুধু অনাদরে,
নয়নে সে হয়েছে মগন।

যে দিন পাঠিয়েছিলুম প্রেম-নিমন্ত্রণ-
অবসর হয় নি তোমার,
আজ তুমি উজ্জ্বল করেছ গ্রহণ,
কি অদৃষ্ট তোমার আমার!

ভেব'না যন্ত্রণা দিতে, গঞ্জনা, ধিক্কারে,
আজ আমি এসেছি হেথায়,
আপনার চেয়ে ভালবেসেছিলুম যা'রে-
তা'র কথা কা'রে কথা যায়?

বাহিরে, যেথায় তোরে করে পরিহাস-
ক্ষীণ কণ্ঠে সেথা তুলি হাসি,
অন্তরে অন্তরে বাঁধা স্মৃতি নাগপাশ,
সঙ্গোপনে অশ্রুজলে ভাসি।

তবুও কাঁদেনা প্রাণ পূর্বের মতন,-
অনুভূতি তীক্ষ্ণ নহে আর,
জেনেছি মৃত্যুর স্বাদ না যেতে জীবন;
অশ্রুশূন্য শুরু হাহাকার!

BANGLADARSHAN.COM

একদিন-না-একদিন

একদিন-না-একদিন, কারো-না-কারো কপালে
ঘটেছে যা'-তাই নিয়ে ভাই বৃথাই মাথা বকা'লে।

সীতার নামে কলঙ্ক আর লক্ষ্মণেরে অবিশ্বাস,
ধ্যানভঙ্গ শঙ্করের ও যুধিষ্ঠিরের নরকবাস;
এমন সকল কাণ্ড যখন আগেই গেছে ঘ'টে,
তখন তুমি খ্যাতির খেদে গরম কেন চ'টে?
চ'লতে গেলেই লাগে ধূলো,
ধুয়ো তখন ও-সব গুলো,
তা'ব'লে কি পথ দিয়ে, ভাই, চ'লবে নাক' মোটে?

একদিন-না-একদিন, কারো-না-কারো কপালে
ঘটেছে যা'-তাই নিয়ে ভাই বৃথাই মাথা বকা'লে।

অরসিকে রসের কথায় হয় ত' যাবে ভোলা'তে,
অপ্রেমিকে মনের ব্যথায় হয় ত' যাবে গলা'তে;
অঘটন যা' ঘ'টবে তা'তে-সেটা কিন্তু স্বাভাবিক!
কাজেই তা'তে বিলাপাদি, বেশী রকম, নহে ঠিক,
পরকে কেন মন্দ কই?
মনের মত নিজেই নই।

আমাদের এই রোষ তুষ্টি-অধিকাংশই আকস্মিক!

একদিন-না-একদিন, কারো-না-কারো কপালে
ঘটেছে যা'-তাই নিয়ে ভাই বৃথাই মাথা বকা'লে।

নৈশ-তর্পণ

জলের লীলা মিলিয়ে গেল নিবিড় আঁধারে,
আলোক-মালা উঠল ফুটে নদীর দু'ধারে;
নৌকা'পরে আলোক নড়ে,
নদীর জলে রশ্মি পড়ে;
উঁকি দিয়ে ঢেউগুলি তায় ছুটছে কোথা রে
বুঝি বা কোন্ ঘুরনি দিয়ে অতল পাথারে।
পরাণ আমার কেমন তা'তে হ'ল যে বিকল,
প'ড়ল ঘন নিশাস, চোখেও প'ড়ল এসে জল!

অমনি ক'রে আমার মনে উঁকি দিয়ে হায়,
কতই হাসি-মুখের ছবি নিমেষে লুকায়;
কেউ বা ভাল বেসেছিল,
মধুর মৃদু হেসেছিল,
কার কাছে বা ততটুকুও হয়নিক' আদায়,
কেউ বা গেছে মানে মানে, কেউ ঠেকেছে দায়।
সবার তরেই আজকে আমি হ'য়েছি বিহ্বল;
উঠছে ঘন নিশাস, চোখেও প'ড়ছে এসে জল।

কেউ ডুবেছে অতল জলে, ভেসেছে বা কেউ,
ছুটেছে কেউ কূলের পানে মখন ক'রে ঢেউ;
কেউ হরষে জলে ভাসে,
কূলের পানে চেয়ে হাসে,
কেউ বা ভাসে চোখের জলে, ত্রাসে মরে কেউ;
কূলে ব'সে উদাস মনে কেউ বা গণে ঢেউ,
আজকে আমি সবার তরেই হ'য়েছি বিহ্বল,
প'ড়ছে ঘন নিশাস, চোখের শুকায় নাক' জল।

যে কেউ মোরে ক'রে গেছে স্নেহের অধিকারী,-
নয়ন-জলে জানাব আজ আমি সে সবারি;
জানিয়ে যাব আরো বেশী,

হয়নি যেথা মেশামেশি,
ঘটেছিল যেথায় শুধু চোখের লেনা দেনা।
জানিয়ে দেব চোখের জলে আমি সবার কেনা।
আমি যে আজ সবার তরেই রেখেছি কেবল,
একটা ঘন নিশাস, চোখের একটি ফোঁটা জল।

BANGLADARSHAN.COM

মৎস্য-গন্ধা

দ্বীপে উষা এল কুয়াসায়,—
কোলের মানুষ চেনা দায়,—
চারি ধারে ঘিরি' তা'রে জলের আক্রোশ,
বাহিরে রোষের ছায়া—অন্তরে সন্তোষ।

হিমরাশি ফণা তুলে ধায়,
মৎস্য-গন্ধা তরণী ভাসায়।

তরী চলে ডুবায় মৃগাল,
হাতে তার আর্দ্র কালো জাল;
দৃঢ় মুঠি—টানে জাল, পড়েনি মীন।
হ'য়োনা মলিন বালা আজি শুভদিন;—

জালে ধরা দেছে পরাশর!

তরী'পরে সোনার বাসর!

কোথা দিয়ে কাটে দিন রাত,
ঋষি নাহি মুদে আঁখি-পাত;

ধীরে ধীরে মিলাইল—কুয়াসার ঘর,
কাটায় মোহের ঘোর উঠে পরাশর।

মৎস্যগন্ধা—পদ্ম-গন্ধা আজ,

কোলে তার শিশু 'ব্যাস' করিছে বিরাজ।

BANGLADARSHAN.COM

আলেয়া

“পুড়ে মরি-পতি নাহি পাই,
কোথা পা’ব জুড়াবার ঠাই?
জ্বালার অবধি মোর নাই।

দিন রাত শুধু হাহাকার,
শ্বাস-বায়ু অনল আমার,
মৃত্যু হ’ল-গেল না বিকার!

জ্ব’লে মরি, আকুল জ্বালায়,
ঘুরি তাই বিজনে জলায়,
মোর পিছে-কেন এস, হয়!

ফিরে যাও পথিক, পথিক,
মাড়ায়োনা কখন’ এ দিক,
এ পথের নাহি কোন’ ঠিক
ধ্রুব-তারা নহি আমি ভাই,
আলেয়ার পোড়া মুখে ছাই,
পুড়ে মরি-পতি নাহি পাই!

শীতল হইবে তনু ব’লে-
মাঝে মাঝে ডুবি গিয়া জলে,
উঠিলে দ্বিগুণ পুনঃ জ্বলে।

মুখ দিয়া উগারি অনল,
পবন ছড়ায় হলাহল,
ক্ষণকাল-সকলি বিকল!

আবার যা’ ছিল হয় তাই,
শান্তি নাই-যন্ত্রণা সদাই,
পরিণাম হ’ত যদি ছাই।

BANGLADARSHAN.COM

ভাবিতাম বেঁচে সুখ নাই,
এবে দেখি মরণেও তাই,
পুড়ে মরি-পতি নাই পাই।”

BANGLADARSHAN.COM

সহমরণ

‘জিজ্ঞাসিছ পোড়া কেন গা’?
‘শুনিবে তা’?–শোন তবে মা–
দুখের কথা ব’লব কা’রে বা।

জন্ম আমার হিদুর ঘরে,
বাপের ঘরে, খুব আদরে,
ছিলাম বছর দশ;
কুলীন পিতা, কুলের গোলে,
ফেলে দিলেন বুড়ার গলে;
হ’লাম পরের বশ।
আচারে তার আস্ত হাসি,
–বল্ব কি আর পরকাশি,–
মিটল সকল সাধ;–
হিদুর মেয়ে অনেক ক’রে
শ্রদ্ধা রাখে স্বামীর ’পরে,
তাতেও বিধির বাদ।

বুড়াকালের অত্যাচারে,–
শয্যাশায়ী ক’র্লে তা’রে,
জেগেই পোহাই রাতি;
দিন কাটেত’ কাটেনা রাত,
মাসেক পরে গেল হঠাৎ,–
নিবল জীবন-বাতি।

কতক দুঃখে, কতক ভয়ে,
শরীর এল অবশ হ’য়ে
ভাঙল সুখের হাট;
খ’য়ের রাশি ছড়িয়ে পথে,
চ’লল নিয়ে শবের সাথে,–
যেথায় শ্মশান ঘাট।

BANGLADARSHAN.COM

গুঁড়িয়ে শাঁখা, সবাই মিলে,
চিতায় মোরে বসিয়ে দিলে,
বাজল শতেক শাঁখ;
লোকের ভিড়ে ভরেছে ঘাট,
ধোঁয়ায় চিতার আধ্ ভেজা কাঠ,
উঠল গর্জে ঢাক।

(২)

রোমে, রোমে, শিরায়, শিরায়,
জ্বালা ধরে, –প্রাণ বাহিরায়,–
মরি বুঝি ধোঁয়ায় এবার!
আচম্বিতে–চীৎকার রোলে–
চিতা ভেঙে পড়িলাম জলে,
মাঝি এক নিল নায়ে তার।
যত লোক করে ‘মার মার’,
আমার ত’ সংজ্ঞা নাই আর;
যবে ফিরে মেলিনু নয়ান,
দেখি, এক কুটীরের মাঝে
সেই মাঝি–আছে বসে কাছে,–
যে মোরে জীবন দেছে দান।
কয়দিন গেল শুধু কাঁদি;
শেষে তারে করিলাম ‘সাদি’,
ভুলিলাম ক্রমে যত ক্লেশ;
আগুনে গিয়েছে জ্ব’লে রূপ,
তবু ভালবাসে পোড়া মুখ,
সুখে দুখে দিন কাটে বেশ।

* * * *

খেয়া দেয় মরদ জোয়ান,
আছে আরও দেড় বিঘা ধান;
আমি নিজে মিশি বেচি মা,–
শুনিলেত’–পোড়া কেন গা’!

চিত্রাৰ্পিতা

কে তুমি মহিমাময়ী, অয়ি চিত্রাৰ্পিতা,
ধৰিয়াছে বীণা-ছাঁদে শিশুরে আপন?
কচি মুখ খানি তার, চুলে ভরা মাথা,
দেখাইছ স্নেহভরে; করিয়া গোপন

নিজ মুখ, মাতার উচিত মহিমায়;
আকর্ষিতে দৃষ্টি শুধু সন্তানের পরে,
নিজরূপ অপ্রকাশ রেখেছ হেলায়;
জননী তুমিই বটে-বিধাতার বরে।

দেখা যায় শিরে রুম্ব কবরী তোমার,-
প্রবাসর কি পতি তব? অয়ি মৃদুপাণি!
পাশে যে কুকুর তব-হায়, সে কাহার?-
কোথা তিনি?-সে কি যায় না ছবিখানি?
তাই কি, নয়ন-জল করিতে গোপন,-
বসেছ-ফিরায়ে হায় মু'খানি আপন?

BANGLADARSHAN.COM

মমতাজ

হে সুন্দরী, অয়ি মমতাজ!

শোন গো তোমার জয়,

শোন সৌন্দর্যের জয়,

বিশ্বময় শুধু ওই আজ!

সৌন্দর্য্য-দেবতা তুমি রাণী!

প্রেমের প্রতিমা তুমি,

তোমার সমাধি-ভূমি—

প্রেমিকের চির মৌন বাণী!

সম্রাটে মমতা-পুতলী!

মোমের রচিত দেহ,

ফুলের রচিত গেহ,—

ছেড়ে তুমি কোথা গেলে চলি’?

তোমার তনুর অনুরাগে,

দেখগো, পাথর কিবা

পুঞ্জিত ফুলের শোভা

ধরিয়ো, তোমাতে ঘিরি’ জাগে!

সম্রাটের রত্নময়ী তাজ!

ইষ্টদেবী শাজাহাঁর,

দেখিলে না একবার—

কি ধনে মগ্নিত তুমি আজ?

BANGLADARSHAN.COM

যাদুঘর

যাদুঘরের কবাট পড়ে,
মায়াদেবীর টনক নড়ে,
যেথায় ছিল যে,—
মায়ার কলে,—নূতন বলে,—
উঠল সে বেঁচে!

BANGLADARSHAN.COM

মমি

পাশ মোড়া দিয়ে, ঢাকন ঠেলিয়া,
জাগিয়া উঠিল ‘মমি’,
মিশরের যত বুড়া যাদুকর
দাঁড়াল তাহারে নমি’।
গুঁড়া হ’য়ে পড়ে পুঁথি, বেশবাস,
গুঁড়া হ’য়ে ঝরে চর্ম;
যত চাহি তত মনে বাড়ে ত্রাস,
তত বাহিরায় ঘর্ম!
বাম হাতে তার কবিতার পুঁথি,
হরিতালে মোড়া মুখ,
নয়ন কোটরে অতল আঁধার;
দুরু দুরু কাঁপে বুক!

অতি ক্ষীণ স্বরে, কহিল সে ধীরে,
সোণারিয়া ‘রমেশেশ’,—
“নীল-নদ-নীরে ঘন শরবন,
তীরে সে মিশর দেশ;
আমি সে দেশের রাজার সভায়
ছিলাম প্রধান কবি;
আজি কেহ নাই বুঝিতে সে বাণী,—
বুঝিতে সে সব ছবি।

কমলের বন হয়েছে উজাড়,
মৃগালে সে শোভা নাই;
কালি যেথা ছিল রাজার প্রাসাদ,—
বিজন আজি সেই ঠাঁই।

মরেছে হরিণ, হ’ল বহুদিন,
ছিল তবু মৃগনাভি;—
তিলে তিলে ক্ষ’য়ে মোর গাথা সনে

BANGLADARSHAN.COM

ফুরাইবে তাই ভাবি।

আছিল যখন মিশরের দেহ
শক্তি-সতেজ প্রাণ,-
পৃথিবী তখন স্থপতি কলার
পায়নিক' সন্ধান,

স্নায়ু ও শিরায়, যবে, হাতে, পা'য়,
ক্ষীণ হ'য়ে এল বল,-
স্থপতি, ভাস্কর, কবি, চিত্রকর,
বাঁচিতে করিল কল!

কূপের সলিল ছড়াইতে মাঠে
শুকায়ে উঠিল কূপ,
পাথরের চাপে মরেছে মানুষ,
পুরী মরু সমরূপ।

সে দেখিবে ছবি, প্রতিমা, দেউল,
কে শুনিবে আজি গান?

মরিয়াছে মৃগ তৃষায় পাগল,-
বোঝেনি-মরুর ভাণ।”

পাশ-মোড়া দিয়ে ঢাকনের তলে
ঘুমায়ে পড়িল 'মমি',
কে কোথা লুকা'ল কিছু না বুঝিনু
উঠিনু যখন নমি'!

* * * *

যাদুঘরে অন্ধকার!
ঘোরে কত জানোয়ার।
ডাকে কত পাখী,
মাছ কিল্ কিল্, সাপ হিল্ বিল্,
শিলা মেলে আঁখি।

* * * *

তা' সবে এড়ায়ে ছাড়ি হাঁফ,,

তড়াতাড়ি-একেবারে নেমে পড়ি, গোটা কুড়ি ধাপ;
‘মায়ার সহিত
আসি উপনীত-’
যেথায় সাজান’ শুধু পাথরের চাপ।

BANGLADARSHAN.COM

যক্ষ-মূর্তি

তা'রি মাঝে, দেখিলাম অপরূপ-
পাষাণে খোদিত, এক মনোরম-মদনের যুগ!

মত্ত যক্ষ-রাজ,
মুরজার লাজ-

ভাঙিতে, যতনে এত, তবু সে বিরূপ!

শিশু-কাম দিতেছে বসনে টান,
কুবের সাধিছে ধরি'-‘রতিফল’ করিবারে পান;

বাধা দিয়া তায়-
দ্বিগুণ বাড়ায়,

আগুন জ্বলিলে আর নাহি পরিত্রাণ,

“কথা রাখ-আর ফিরায়োনা মুখ,

এবার-পড়েছ ধরা, সুখে যে দ্বিগুণ দেখি বুক!

মুখে শুধু রোষ,
মন পরিতোষ,

কি যে স্বভাবের দোষ-তবু দিবে দুখ!”

কত যুগ অমনি কেটেছে, হায়,

সাধিতে বিরতি নাই, তবু মুখ কভু না ফিরায়!

তবু, পেতে হাত-

কাটে দিন রাত,

মূলে সে হাবাত হ'লে, কি হ'ত উপায়?

কত যুগ অমনি গিয়েছে চ'লে!

ধরিয়া রয়েছ, তবু আনিতে পারনি তারে কোলে;

আর তুমি,-পাশে,-

স্ফুরিত উল্লাসে,-

স্থির যে র'য়েছে আজো-সে পাষাণী ব'লে!

মমির হস্ত

(১)

কার দেহে, কোন্ কালে, লগ্ন ছিলে তুমি,—
নীলিমা-মণ্ডিত, ক্ষুদ্র, কঙ্কালাগ্র কর?
তার পর কত গেছে সহস্র বৎসর—
রক্ষা-লেপে লিপ্ত হ'য়ে লভিয়াছ ভূমি?
কবে সে—কবে সে হয়, গেছে তোরে চুমি',
মানবের সঞ্জীবন তপ্ত ওষ্ঠাধর
শেষ বার? হয়, কত যুগ-যুগান্তর
আগে, শিশুর আগ্রহে স্পর্শিয়াছ তুমি
জননীর বুক; কত খেলিয়াছ খেলা,—
কত নিধি উৎসাহে ধরিয়া ফেলে দেছ,—
প্রথম যৌবনে কত করিয়াছ লীলা;
নব রক্তোচ্ছ্বাসে সাজি, কতই খেলেছ—
লয়ে নিজ কেশ, বেশ, নয়ন, অধর
আজ অস্থিসার—তবু মুগ্ধ এ অন্তর!

(২)

রাজদণ্ড হয় ত' গো ধরিয়াছ তুমি,
আজ তুমি কাচ পাত্রে কৌতুক-আগারে!
আজ গ্রাহ্য কেহ নাহি করে গো তোমারে,
দিন ছিল, হয় ত' কৃতার্থ হ'ত চুমি,
জনমিয়া ছুঁয়েছিলে কোথাকার ভূমি,
আজ তুমি কোথা, হয়, কোন্ দূর দেশে!
আজ ভালবেসে তোমা' কেহ না পরশে,
প্রত্নতত্ত্বজ্ঞের এবে ক্রীড়নক তুমি,
ওই তুমি—চিন্তাজ্বর করেছ মোচন,—
গোপন করেছ হাসি, মুছেছ নয়ন;

ওই তুমি-হয় ত' গো করেছ রচন
ফুলহার,-কারো তরে কুসুম শয়ন!
দেহচ্যুত, অবজ্ঞাত, হয়ে উদাসী,
ভালবাসা চাহ যদি-আমি ভালবাসি!

BANGLADARSHAN.COM

ডাক টিকিট

ডাক টিকিটের রাশি-আমি ভালবাসি,
যদি তা' পুরাণো হয়-ব্যবহার-করা,
ছেঁড়া, কাটা, ছাপমারা স্বদেশী, বিদেশী;-
তা' সবে পরশি' যেন হাতে পাই ধরা!

যুক্তরাজ্য, চিলি, পেরু, ফিজি দ্বীপ হ'তে,-
মিশর, সূদান, চীন, পারস্য, জাপান,
তুর্কী, রুশ, ফ্রান্স, গ্রীস হ'তে কত পথে
এসেছে, চড়িয়া তারা কত মত যান!

কেহ আঁকিয়াছে বুকো-নব সূর্যোদয়,
শান্তি দেবী-কারো বুকো-তুষার পর্কত,
হংস, জেব্রা, বরুণ, শকুনি, সর্পচয়,
কারো বুকো রাজা, কারো মানব মহত;-
যুগ্ম হস্তী, যুগ্ম সিংহ, ড্রাগন ভীষণ,
দীপ্ত সূর্য্য, সূর্য্যমুখী, ফিনিয়, নিশান,
ময়ূর, হরিণ, কপি, বাষ্প জলযান,
দেবদূত, অর্দ্ধচন্দ্র, মুকুট, বিষাগ!

কেহ আনিয়াছে বহি' পিরামিড-কণা!
কেহ বা এসেছে মাখি' পার্থিনন-ধূলি!
নায়েগ্রা গর্জন বিনা কিছু জানিত না,-
এমন ইহার মধ্যে আছে কতগুলি!

কেহ বা এনেছে কারো কুশল সংবাদ-
মাখি' মুখামৃত, বহি' সাগ্রহ চুম্বন!
কেহ বা পেতেছে নব বাণিজ্যের ফাঁদ;
কেহ অনাদৃত, কারো আদৃত জীবন!

সকল গুলিই আমি ভালবাসি, ভাই,
সমগ্র ধরার স্পর্শ পাই এক ঠাঁই!

BANGLADARSHAN.COM

উল্কা

তিমিরের মসীলেপ নিমেষে ঘুচায়
বিশ্বচিত্রপট হ'তে,—পরিষ্ফুট করি'
প্রত্যেক পল্লবে, শাখে, তৃণে, জলাশয়ে,
দেউলে, প্রাসাদে, পথে,—ফুটাইয়া, মরি,

ভূজপাশে বন্ধ সহচরে,—চকিতের মত,
জ্যোৎস্না-খণ্ড-রূপে হয়, চকিতে আবার
কোথায় ডুবিলে উল্কা? তারা লক্ষ শত
মুদিল নয়ন, হেরি এ দশা তোমার।

কোথা ছিলে? কোথা এবে চলিয়াছ, হয়!
সূর্য্যতেজে পুড়িতে কি পড়িতে ভূমিতে?
অথবা, অনন্ত কাল অভিশপ্ত প্রায়—

অনন্ত অতলে শুধু রহিবে নামিতে?

ছিলে কি জীবের ধাত্রী পৃথিবীর মত?

কিন্মা চিরবক্ষ্যা, শুধু, ধ্বংস তোর ব্রত!

BANGLADARSHAN.COM

স্বর্ণ-গোধা

স্বর্ণ জিনি বর্ণ তোর, নয়ন-রঞ্জন,
স্বর্ণ-গোধা! ভ্রম হয় স্বর্ণময় ব'লে,—
তনু তোর। ঘণ্য কিন্তু তোর পরশন;
নাহি জানি কালকেতু ভুলিল কি ছলে।

সেকি তোরে ভেবেছিল খণ্ড সুবর্ণের?
তুরাশ্বিত তাই বুঝি গেছিল কুড়াতে?
শেষে নিজ ভ্রান্তি বুঝে—মর্মরে পর্ণের—
তীরে বিঁধে এনেছিল অনলে পোড়াতে।

স্থির তুমি থাক যবে, উজ্জ্বল বরণ!
প্ৰীতি লভে বিমুক্ত নয়ন; কিন্তু হয়
অঙ্গভঙ্গী আরস্তিলে—আপনি নয়ন

ঘণা ভরে মুদে যায়, ফিরে নাহি চায়।

জড়মতি রূপসীর অপরূপ হাসি,—

মন হ'তে যেমন মমতা দেয় নাশি।

BANGLADARSHAN.COM

প্রবাল-দ্বীপ

তিমিরে, তিমির অঙ্ঘি যেথা হয় শিলা,
ছিদ্রময় স্পঞ্জ-পুষ্প যেথায় বিকাশ,
সেই সাগরের তলে, সুখে করে বাস-
প্রবাল-দম্পতি এক;-নিত্য নব লীলা!

দিনে দিনে প্রবালের বাড়ে পরিবার,
কত জীয়ে, কত মরে-রাখিয়া কঙ্কাল,
পঞ্জরের বাড়ে স্তূপ, যত যায় কাল;
অজ্ঞাতে পূরণ করে ইচ্ছা বিধাতার।

স্তূপীকৃত যুগান্তের প্রবাল-পঞ্জর-
কোটি কোটি প্রাণ-পাতে হ'য়ে সংগঠিত,
কোটি হৃদয়ের রক্তে হ'য়ে সুরঞ্জিত,-
একদিন তুলে শির সিন্ধুর উপর!

পলি পড়ে, শঙ্খ চরে, জাগে নব দ্বীপ,
ধৈর্য্যশীল প্রবালের যশের প্রদীপ!

BANGLADARSHAN.COM

আগ্নেয় দ্বীপ

পার্শ্বে তা'রি,—সাগরের গূঢ় তলভূমে,
আচম্বিতে সমুখিত মহামন্দ্ররব,
আচম্বিতে মাটি ফাটি', পর্বত ভৈরব
তুলে শির; স্তব্ধ উর্ধ্বি ভয়ে তারে নমে।

আগ্নেয় উৎপাতে ব্রহ্ম জল-জম্বু-দল,—
কালক্রমে পুনঃ যবে হইল নির্ভয়,—
খামিল কম্পন, দূরে গেল তাপচয়,
দেশান্তের পাহু পাখী করি' কোলাহল—

উড়ে গেল;—পড়ে গেল চঞ্চু হ'তে তার
বিস্ময়ে—শস্যের শীষ অভিনব দ্বীপে;
শ্যামল হ'ল সে কালে জীবের আগার,
দাঁড়াইল মৌন মুখে বিধাতা সমীপে।

একে ধৈর্য্য অলৌকিক! অন্যে তেজোবল!
তপস্যার প্রতিভার—পরিপূর্ণ ফল।

BANGLADARSHAN.COM

মূল ও ফুল

ফুল-শুধু দেখাইতে চায়
আপনারে রৌদ্রে জোছনায়;
সমীরে করিতে চায় খেলা,
সারা বেলা রঙ্গ করে মেলা।
অলি বলে দাঁড়া' ওলো যুঁই।
“এই ছুঁই-এই তোরে ছুঁই।”
ফুল বলে, “দুলেছি হাওয়ায়-
আয় অলি এই বারে আয়।”
পাতা পরে মাথা যায় ঠুকে,
অলি সে পলায় অধোমুখে!

মূল-শুধু লুকাইতে চায়
অন্ধকারে মাটির তলায়;
খেলাধূলা গিয়েছে সে ভুলে,
কখন বা দেখে মাথা তুলে?
কাজ-কাজ-জানে শুধু কাজ,
কাল যথা তেমনি সে আজ।
মাটি হ'তে শোষে শুধু রস,-
কাজ সদা-নাহিক কামাই,
ফুলদল-বেঁচে আছে তাই।

ফুল সে রাজার মত থাকে,
মূল সে চাষার মত পঁাকে!
মাঝে, শাখা পাতার সমাজ,-
গন্ধ, রস, ভুঞ্জে তিন সাঁঝ।

ফুলহীন মূল কত আছে,
মূলহীন ফুল কই বাঁচে?
ফুল ঝরে-ফুটে পুনরায়,
মূল গেলে সকলি ফুরায়।
ফুল তবু উঁচুতেই থাকে!
মূল সে চাষার মত পঁাকে!

ঝড় ও চাৰাগাছ

ঝড় বলে, “উড়ে গেল বড় বড় গাছ—
এখনো আছিস্? আয়, উপাড়িব তোরে।”
“থাক্, থাক্” বলে চাৰা, “না-না থাক্ আজ,”
না শুনিয়া কথা, তারে ঝড় ধরে জোরে।

পাড়ে ভূমি’ পরে আহা; একি! অকস্মাৎ
উঠে চাৰা, মল্ল সম আফ্ফালি’ পল্লব,—
রক্তবীজ যুঝে যেন আপনি সাক্ষাৎ,—
নুয়ে পড়ে ভুঁয়ে, তবু, যুঝে অসম্ভব।

হর্ষে রবি ঢালে শিরে সোনার কিরণ,
শ্রান্তি বিদূরিতে মেঘ হর্ষে ঢালে জল,
বৃষ্টি জলে রৌদ্রে মিলে—হীরকে হিরণ,
ঝলমল তিন লোক,—হাসে পরীদল।

লজ্জায়, পলায় রড়ে, ঝড় দেশ ছেড়ে,
ত্রিলোকের আশীর্বাদে চাৰা উঠে বেড়ে।

BANGLADARSHAN.COM

বাজাও শঙ্খ, বাজাও বিষাগ,
মুক্ত গগনে উড়াও নিশান,
(আজি) কিরণে, তপনে, পবনে, জীবনে,
অভিনব উল্লাস!

BANGLADARSHAN.COM

কোন্ দেশে

(বাউলের সুর)

কোন্ দেশেতে তরুলতা—

সকল দেশের চাইতে শ্যামল?

কোন্ দেশেতে চ'লতে গেলেই—

দ'লতে হয় রে দূর্বা কোমল?

কোথায় ফলে সোনার ফসল,—

সোনার কমল ফোটে রে?

সে আমাদের বাংলাদেশ,

আমাদেরি বাংলা রে!

কোথা ডাকে দোয়েল শ্যামা—

ফিঙে গাছে গাছে নাচে?

কোথায় জলে মরাল চলে—

মরালী তার পাছে পাছে?

বাবুই কোথা বাসা বোনে—

চাতক বারি যাচে রে?

যে আমাদের বাংলাদেশ,

আমাদেরি বাংলা রে!

কোন্ ভাষা মরমে পশি?—

আকুল করি তোলে প্রাণ?

কোথায় গেলে শুনতে পা'ব—

বাউল সুরে মধুর গান?

চণ্ডীদাসের—রামপ্রসাদের—

কণ্ঠ কোথায় বাজে রে?

সে আমাদের বাংলাদেশ,

আমাদেরি বাংলা রে!

কোন্ দেশের দুর্দশায় মোরা—

সবার অধিক পাইরে দুখ—

BANGLADARSHAN.COM

কোন্ দেশের গৌরবের কথায়—
বেড়ে উঠে মোদের বুক?
মোদের পিতৃপিতামহের—
চরণ-ধূলি কোথা রে?
সে আমাদের বাংলাদেশ,
আমাদেরি বাংলা রে।

BANGLADARSHAN.COM

সন্ধিক্ষণ

এতদিনে। এতদিনে বুঝেছে বাঙালী
দেহে তার আজো আছে প্রাণ!
এ জগতে যোগ্য যাঁরা তাঁহাদেরি মাঝে
আমরাও ক'রে নেব স্থান।
যে খুশী টিটকারী দিক
অন্তরে বুঝেছি ঠিক—
এ কেবল নহেক হুজুক;
সন্ধিক্ষণ আজি বঙ্গে, এল নবযুগ!
পথে ঘাটে দেখ চেয়ে অন্দরে বাহিরে
দেশহিতে বিলাস বর্জন,
বিরাট সহস্র শীর্ষ উঠেছে জাগিয়া
লক্ষ মুখে এক দৃঢ় পণ।
যেথা যে বাঙালী আছে,
প্রাণে প্রাণ মিলিয়াছে,
শুভ লগ্ন পেয়েছে বাঙালী,
মনে হয় আর মোরা রবনা কাঙালী।
এ বড় আশার দিন—পণ্য স্বদেশের
সবে তুলে লয়েছে মাথায়;
এবার পরীক্ষা হ'বে প্রতিজ্ঞার বল,
ভগবান হউন সহায়।
ভুলেছিলু মনুষ্যত্ব
বিলাস ব্যসনে মত্ত,
ভুলেছিলু পৌরুষের স্বাদ,—
কে জাগালে সে পৌরুষ?—সিংহের আহ্বাদ!
এ বড় সঙ্কট কাল—পণের রক্ষণ,—
আমাদের ভ্রম পদে পদে,
সতর্ক জাগ্রত যেন রহি সর্বক্ষণ

নাহি ডুবি কলঙ্কের হুদে।
স্মরি স্বদেশের দুখ—
মাতা-পত্নী-কন্যা-মুখ—
নিত্য প্রাতে উচ্চারিব পণ—
“বাঁচাব দেশের শিল্প-দেশের জীবন।”

দরিদ্র দেশের কোলে দরিদ্রের বেশ
আমাদের সাজিবে সুন্দর,
‘খাটা দেহে খাটো ধুতি’—লজ্জা কিবা তায়,
শ্রমের সৌন্দর্য্য মহত্তর।
শক্তিমান দেহমন,
ভীষ্মের মতন পণ,
তার চেয়ে কি আছে শোভন?
জুড়ায় পরাণ মন কি ছার নয়ন?

ভগবান! হীন বলে তুমিই দিয়েছ
এ অপূর্ব নতুন জীবন।
লইয়া অভয় নাম প্রতিজ্ঞা করেছি;
শক্তি দাও রাখিব সে পণ।

নব স্রোত, বঙ্গভূমে,
তোমার নিদেশে নেমে,
সর্বপ্রাণ করেছে সজীব;
হে বরদ! শুভঙ্কর! হে সুন্দর! শিব!

তুমি দাও বুঝাইয়া নিন্দুকে, কুটিলে,—
‘বাঙালিও জন্মেছে মানব,
কার’ চেয়ে তুচ্ছ নয় বাঙালীর দাবী
বৃথা সে করে না কলরব;
মঙ্গল বিধান যত,
স্বদেশের সেবা-ব্রত,
আজ সে মাথায় নেবে তুলে;
মূঢ় সে—যে দাঁড়াইবে তার প্রতিকূলে!’

‘উন্মুক্ত সবারি তরে নিখিল সংসারে
মনুষ্যত্ব-মহত্বের পথ,—
চিরধন্য সে পথে কণ্টক দিতে পারে,—
এমন জনোনা দাসখত;
চুক্তির বেতন পাও,—
সর্বমত কাজ দাও;
যে প্রভু অধিক করে আশ
বল’ তারে—কর্মচারী নহে ক্রীতদাস।’

‘অর্থের সম্বন্ধ হ’তে কত উচ্চতর
মনুষ্যত্ব-দেশহিত-ব্রত;
স্বার্থ সাথে স্বদেশের বিরোধ যেথায়
স্বদেশেরি পায় হব নত।

এ কথা না ভুলে রই—

আমি শুধু তুমি নই—

দেশের মাঝারে একজন;

দেশের—দেশের শুভে কল্যাণ আপন।’

এমনো পণ্ডিত-মূর্খ জন্মেছে এ দেশে,—

শুনিবারে সাহেবের মুখে

নিজের বুদ্ধির কথা; স্বদেশে বিদেশে

“পণ্ড পণ্ড” বলে স্ফীত বুক;

নিজ মুখে মাখি কালি,

লভে শূন্য করতালি,—

হা বঙ্গ! দিয়েছ স্তন্য ইহাদেরো সবে!

শুনি পণপত্রে কত রাজভৃত্য, হায়,

সহি করে অস্পষ্ট অক্ষরে!

কি লজ্জা! এতই ভয় চাকুরীর তরে?

কি লভিবে দাস্যবৃত্তি ক’রে?

বাণিজ্যে বসেন রমা,

কৃষি পায় তার সমা,

দুই পছা উন্মুক্ত তোমায়।

BANGLADARSHAN.COM

তবু দ্বিধা-কৃত মন? জঘন্য আচার!

স্বার্থান্ধ স্বদেশদ্রোহী জান নাকি হয়—

জান নাকি আত্মদ্রোহী তুমি;

পুত্র পৌত্র অশ্লাভাবে মরিবে; এখনো

প্রসারিয়া লও কর্মভূমি।

কারে কর পরিহাস?

নিজ স্ত্রীর লজ্জাবাস—

তাও নহে আয়ত্ত-অধীন!

সত্য তুমি অতি দীন—অতি দীন হীন।

আজি যারা অনাগত—ভবিষ্য যাদের

কি মান তাদের কাছে পাবে?

কোন্ স্বত্ব কোন্ বিভূ—শ্ববৃত্তি ব্যতীত—

তাহাদের তরে রেখে যাবে?

কোন কর্ম কোন্ নীতি,

কোন্ মহত্ত্বের স্মৃতি—

তাহাদের হবে মূলধন?

স্মরিয়া তাদের কথা—দৃঢ় কর পণ।

পাঠশালে ছাত্র করে বিদেশী-বর্জন,

চমৎকার! দৃশ্য চমৎকার!

বিলাস-বর্জনে হের তরুণী ছাত্রীরা

অগ্রগামী আজি সবাকার।

বল' রাজপুতানারে,—

বেণী বিসর্জিতে পারে

বঙ্গনারী তাঁদেরি মতন,

অন্তরে সে বীরঙ্গনা, শৌর্য্যে ভরা মন।

শিক্ষক শিখান আজি বালকে যুবকে

হইবারে দেশের সেবক;

যত ধনী মহাজন পণ-বন্ধ সবে,

উর্ধ্ব শিখা উৎসাহ পাবক।

BANGLADARSHAN.COM

মহাপ্রাণ, সমুদার,
কত শ্লাঘ্য জমীদার
লয়েছেন দেশহিত-ব্রত;
মুক্তকোষ সবে, প্রাচ্য রাজাদেরি মত।

আর আজি ধন্য তুমি দরিদ্র বাঙালি,—
দিয়েছ সংশয় বিসর্জন
যেন মন্ত্রবলে তুমি মুক্তহস্ত এবে,
কোথা পেলে এত বড় মন!

পরস্পরে এ প্রত্যয়—
যত্নে আসিবার নয়;
এ রত্ন দেছেন ভগবান!
অন্তরে সঞ্চিত করি' রাখ দৈবদান।

বৎসরান্তে ভাদ্রশেষে শুধু একবার

কূল প্লাবি' আসে যে জোয়ার,
তাহার তুলনা নাই; সমস্ত বৎসরে
সে জোয়ার আসে একবার।

সে জোয়ার এসেছে রে
আমাদের ঘরে ঘরে,
এসেছে রে নূতন জীবন।

বাঙালী পেয়েছে আজ সামর্থ্য নূতন।

কণা কণা স্বর্ণ ছিল মৃত্তিকার মাঝে,
ধূলি পারা ধূলি মাঝে হারা;
আজি কোন্ অনির্দিষ্ট ভূগর্ভে তাপে
গলে মিলে হ'ল স্বর্ণধারা।

হার গড়ি সে কাঞ্চনে,
এস সবে, সযতনে—

পরাইব দেশের গলায়;
জননী! জন্মভূমি! সাজাব তোমায়।

বাহিরের ঝড় এসে ভাঙে যদি ঘর—

কোথা থাকে পুত্র পরিবার?
অন্তরে প্রবল হাওয়া উঠিয়াছে যদি
নত হও সম্মুখে তাহার।
স্বদেশ, তোমার পানে—
দেখগো উদ্দিগ্ন প্রাণে
কাতর নয়নে চেয়ে আছে।
আশা করে মাতৃভূমি প্রত্যেকেরি কাছে।
পবিত্র কর্তব্য-ব্রত লয়েছি মস্তকে,
মরেও রাখিতে হবে পণ!
রাজ্যপণে পাশা খেলি', পণরক্ষা হেতু
বনে গেছে হিন্দু রাজগণ।
বিদেশের মুখ চেয়ে,
শতক লাঞ্ছনা সয়ে,
সংজ্ঞা যদি এসেছে আবার,—
প্রতিজ্ঞা স্মরিয়া, শীঘ্র লও কার্য্যভার।
এদিন অলসে গেলে, কি ক্ষতি যে হবে—
দেখ বুঝে অন্তরে সে কথা;—
আশা ভঙ্গ, মনঃক্ষোভ, শক্তি অপচয়,
শত দিকে পাবে শত ব্যথা;—
শত্রু সে পাড়িবে গালি,
দু'গালে পড়িবে কালি,—
আমল পাবেনা কারো ঠায়ে।
আবার সহস্র বর্ষ পড়িবে পিছায়ে।
জাতিত্ব গৌরব যাবে অন্ধুরে মরিয়া,
ঝরিবে রে আধ-ফোটা ফুল;
ভগবান! রক্ষা কর—শক্তি কর দান,
প্রভু! মোরা হয়েছি ব্যাকুল!
দুর্ব্বলের বল তুমি!
দীনের শরণ-ভূমি!
আশ্রয় লইনু তব পায়!

BANGLADARSHAN.COM

লজ্জা-নিবারণ সখা! হও হে সহায়!

কে আছ হে ধনবান আন' স্বর্ণ-ধন,
কায়ক্লেশ আন' শ্রমী যেবা,
শিল্পী আন' নিপুণতা, উদ্যোগী উদ্যম,
সবে মিলি কর মাতৃ-সেবা।

পরিশ্রমে নাহি লাজ

আপনি চাষীর কাজ,-

করিতেন রাজা মিথিলায়!

মন্ত্রদ্রষ্টা তুষ্ঠা ঋষি আদি সূত্রধার!

সুবেশ রাখাল-বেশ সকলি ভুলিয়া,

ধন্য হও স্বদেশের কাজে;

প্রতিজ্ঞা রাখিয়া স্থির স্থানুর মতন

মান্য হও জগতের মাঝে।

আত্মতেজে করি' ভর-

কর্ম্মে হও অগ্রসর!

মূর্খে শুধু বলে এ 'হুজুগ';

বঙ্গ-ইতিহাসে হের এল স্বর্ণযুগ!

BANGLADARSHAN.COM

হেমচন্দ্র

বঙ্গের দুঃখের কথা, সদা করি গান,
দুঃখের জীবন তব হ'ল অবসান,—
হে কবীন্দ্র! হেমচন্দ্র! চ'লে তুমি গেলে,—
সে কি গাহিবারে গান দেবসভাতলে?
বাসবের সভাতলে কি গাহি'ছ গান?
ভারত-ভিক্ষার কথা? কিম্বা ভিন্ন তান,—
গাহি'ছ,—কেমনে বাস করিল পাতালে
দুর্ভুক্ত বৃত্তের ত্রাসে, বাসব সদলে,
পরাজিত অধোমুখ; বর্ণিতে তাদের—
গাহিতে গাহিতে হয়—চাহিছ কি ফের
অতি নিম্নে—পরাজিত ভারতের পানে?
—তোমার সে মাতৃভূমি—সুধা যা'র স্তনে,—
তার কথা স্মরি' কি বারি'ছে আঁখি-জল?
জিজ্ঞাসে কি অশ্রু'র কারণ দেবদল?
কি বলিবে, হয় কবি, কি দিবে উত্তর?
অন্তর্যামী জানিছেন তোমার অন্তর।

BANGLADARSHAN.COM

দুর্যোগ

কি যেন মলিন ধূমে কি যেন অলস ঘূমে,
আকাশ রয়েছে ঢাকা সব একাকার;
ছায়া-ম্লান তরু-শির, প্লাবিত তটিনী-তীর,
বিরাম বিশ্রাম আর নাহি বরষার।

উষার কনক হাসি, আর না জাগায় আসি’
হৃদয়ে উদ্দাম আশা আনন্দ অপার;
এখন নিশির শেষে, রুগ্ন বালিকার বেশে—
জীবন জাগায় এসে মরণ সাকার।

তাপহীন, দীপ্তিহীন, এমনি চলেছে দিন;—
বঙ্গের এ দুর্যোগের নাহি বুঝি শেষ!
এ জল ফুরাবে না রে, এ আঁখি শুখাবে না রে;
ঘুচিবে না বুঝি আর এ মলিন বেশ।

কত দিন আলো নাই, ভুলে যেন গেছি তাই,
কে বলিবে ছিল না কি?—মূকের স্বপন;
কবে নাকি, স্বর্ণ ছবি, পূরবে গৌরব রবি
উঠেছিল একবার, হয়গো স্মরণ।

কিরণ পরশে তার দেশে এল হর্ষভার,
সে দিন প্রথম, বুঝি, সেই দিনই শেষ;
এসেছিল পথ ভুলে তাই তুরা গেল চ’লে,
প্রভাত সে না পোহাতে শূন্য হ’ল দেশ!

প্রিয়জন উপহার— শুকাইল ফুলহার,—
তবু কি ফেলিতে তারে পারে কোনো জন?
গেছে বর্ণ, গন্ধ যত, কর্কশ কাঁটার মত,—
তবু সে যে প্রিয় স্মৃতি যতনের ধন।

তাই—পূর্ণ অনুরাগে; আজিও হৃদয়ে জাগে
সে কাহিনী, মেঘে যেন ক্ষণপ্রভা খেলে;

জানি সে বিফল, হয়, নাহি প্রাণ শূন্য কায়,
আগুনের গুণ কি গো ভস্মে কভু মেলে?

এল গেল নিশি দিন, মলিন, লাভণ্যহীন,
এ বরষা ফুরা'লনা, শুকা'লনা জল;
আকাশ, পৃথিবী নাই, দাঁড়বার নাহি ঠাই,
প্লাবনে হয়েছে এক অকূল অতল!

আমরা ডুবিয়া আছি, মরেছি কি বেঁচে আছি
জানি না, প্রকৃতি মাগো, ডেকে নে জুড়াই;
দক্ষিণ দুয়ার খুলে ডুবাও গো সিন্ধুজলে,
হয়েছি পরের বোঝা-ঘরের বালাই।

সেথা নাহি ভেদাভেদ, নাহি মা মনের ক্লেদ
ঢেকে দে বঙ্গের মুখ, বেঁচে কাজ নাই;
অবাধ অনন্ত জল, নাহি নীর, নাহি তল,
মুক্ত পথে ছুটে যা'ব,—দে না মাগো তাই।

তা' যদি দিবি না, তবে, দেখাস্নি ও বিতবে,—
শরতের শুভ্র হাসি, বসন্ত-বিলাস;
যাহারে সাজে, মা, হাসি, তাহারে দেখাস্ আসি—
বিচিত্র বরণে আঁকা তোর 'বার মাস'।

যা'রা জগতের কাছে নতশির হ'য়ে আছে,
জগতের কোনো কাজে নাহি যা'র যোগ;
হৃদয়ে নাহিক বল, জীবনে তার কি ফল?—
আলোকে পুলকে তার শুধু কর্মভোগ।

দিস্ না, মা, নাহি চাই, আমাদের কাজ নাই—
হৃদয়-মাতান' তোর নব রবিকর;
থাক্ এই অন্ধকার, মলিনতা বরষার,
ক্ষুদ্র মোরা, তুচ্ছ মোরা, জগতের পর।

বরষার নিবিড়তা দিক্ প্রাণে আকুলতা,
আপনা চিনিব তবু, আপনা চাহিয়া;

সৌন্দর্য্য নিবিয়া যাক্, ধরণী ডুবিয়া থাক্,
আপন দারিদ্র্য শুধু উঠুক ফুটিয়া।

অস্তহীন অবসাদ, দিক্ প্রাণে নব সাধ,-
যেতে জগতের কাজে উৎসাহ দ্বিগুণ;
আয় বরষার ধরা, আয় গো আঁধারি' ধরা,
কালিমা ঢেলে দে, হৃদে জেলে দে আগুন!

BANGLADARSHAN.COM

বঙ্গ-জননী

কে মা তুই বাঘের পিঠে ব'সে আছিস্ বিরস মুখে?
শিরে তোর নাগের ছাতা, কমল-মালা ঘুমায় বুকো!
ঢল্ ঢল্ নয়নযুগল জল ভরে পড়ছে ঢুলে,
কাল মেঘ মিলিয়া গেল তোর ওই নিবিড় কাল চুলে,
শিথিল মুঠি,—ত্রিশূল কেন ধরায় ধূলা আছে চুমি'?
কে মা তুই কে মা শ্যামা—তুই কি মোদের বঙ্গভূমি?

মা তোর ক্ষেতের ধান্যরাশি জাহাজ ভ'রে যায় বিদেশে,
অন্ন-সুধা বঙ্গে ফেরে গরল হ'য়ে সর্ব্বনেশে!
বনের কাপাস বনে মিলায়, আমরা দেখি চেয়ে চেয়ে,
অন্নবসন বিহনে হয়, মরে তোমার ছেলে মেয়ে!
বল্ মা শ্যামা সুধাই তোরে, মোদের এ ঘুম ভাঙবে নাকি?
ধন্য হ'তে পারব না মা তোমার মুখের হাসি দেখি?

ত্রিশূল তুলে নে মা আবার রূপের জ্যোতি পরকাশি,
ভয় ভাবনা ভাসিয়ে দিয়ে হাস আবার তেমনি হাসি!

চরণতলে সপ্ত কোটি সন্তানে তোর মাগেরে—

বাঘেরে তোর জাগিয়ে দে গো, রাগিয়ে দে তোর নাগে রে;
সোনার কাঠি, রূপার কাঠি,—ছুঁইয়ে আবার দাও গো তুমি,
গৌরবিণী মূর্ত্তি ধর—শ্যামাঙ্গিনী বঙ্গভূমি।

‘স্বর্গাদপি গরীয়সী’

বঙ্গভূমি! কেন মাগো হইলে উর্করা?
তাই, মা, নয়ন-বারি ফুরা’ল না তোর;
স্বর্গ হ’তে গরীয়সী জন্মভূমি মোর,
এ স্বর্গে দেবতা কই? দেখায়ে দে তুরা।

বল্ মোরে, কোন্ হেতু, সুপ্ত আজি তারা?
অথবা, মগন কোনো তপস্যায় ঘোর?
কবে ধ্যান ভাঙিবে গো,—নিশি হ’বে ভোর?
কবে, মা, ঘুচিবে তোর নয়নের ধারা?

অসুরে ঘিরেছে, হায়, কল্প-তরুবরে,
দেবতার কামধেনু দানবে দুহি’ছে!
আজি হ’তে অশ্বেষি’ ফিরিব ঘরে, ঘরে,
কোথা ইন্দ্র?—ব’লে দেগো, কাঁদিস্নে মিছে।
সে যে তোরে অস্ত্রি দিয়ে গ’ড়ে দিবে অসি;
অয়ি বঙ্গ! অয়ি স্বর্গ! অয়ি গরীয়সী!

BANGLADARSHAN.COM

আশার কথা

জননী গো-আজি ফিরে-

জাগিতেছে তব সন্তান সব

গঙ্গার উভতীরে!

বাড়িতেছে তব কুটারে,

ললিত বক্ষ-রুধিরে,

সন্তান কোটি কোটি গো,

দৃঢ় উন্নত শিরে!

আর নহে কেহ অসুখী,

জননীর ভার শিরে আপনার

তুলে নেছে নব বাসুকি,-

শত সহস্র শিরে!

উজ্জ্বল হাসি আননে,

ক্ষোণী বাজিতেছে সিন্ধুর তীরে

কর্করী বাজে কাননে;

নব সঙ্গীত গাহি'ছে,

নূতন তরণী বাহি'ছে,

পরাণ নূতন চাহি'ছে,

বিশ্ব-বিহারী নূতনে!

দখিণে গেছে অগস্ত্য,

পশ্চিমে গেছে ভার্গব, যেথা

সূর্য না জানে অন্ত!

গেছে রঘু প্রাগ্‌জ্যোতিষে,

বিশ্ব ছেয়েছে দলে, দল, দলে,-

ভিক্ষু, শ্রমণ, বোধীশে;-

দীপ্তি বহি' তিমিরে!

ধনপতি সে শ্রীমন্ত,-

সিংহল-জয়ী বিজয় সিংহ,-

কীর্তি-কথা অনন্ত!

জ্ঞানে বিজ্ঞানে সিদ্ধ,
বীর্যে-উদার, স্নিগ্ধ,
আচারে জগৎ মুগ্ধ,
সেবায় নহেক' ক্লান্ত;-
হেন সন্তান, আজ,
আইল কি পুনঃ আলয়ে তোমার,-
ঘুচাইতে দুখ, লাজ?
তোমারি মন্ত্র-ভাষা গো,-
পূত, সুললিত, সঙ্গীত জিনি'
অন্তর-পরকাশা গো;-
জাগিছে আজি সে ফিরে!
সপ্ত সাগর তীরে,-
তোমার সপ্ত কোটি সন্তান
শত কোটি হ'বে ধীরে!
(মোরা) নৌকা ভরেছি পণ্যে,
(তুমি) আশিষ' দূর্বা-ধান্যে,
জননী! তোমারি পুণ্যে-
(মোরা) সকলি পাইব ফিরে।
নৌকা-ছুটেছে অধীরে!
সাত ডিঙা ধন কোন্ প্রয়োজন?
ঘিরিয়া ফেলিব মহীরে;
অচিরে-কিস্বা ধীরে!

BANGLADARSHAN.COM

দ্বিতীয় চন্দ্রমা

স্বপনে দেখিনি রাতে, হে ভারত-ভূমি,
সাগর-বেষ্টিতা অয়ি মর্ত্যের চন্দ্রমা
কুহকী নিদ্রার বশে সংজ্ঞাহীন আমি,—
গুনি মাহিমা তব অয়ি বিশ্বরমা!

দেখিলাম, মহাকূর্ম সাগরের তলে,
বলিলেন মন্দ্রভাষে নাগদলে ডাকি’,
“খুলে দে বন্ধন যত, শিরে ধর তুলে,
অপূর্ষ এ ভূমি, আয় দেবলোকে রাখি।

পৃথিবীর গন্ধ নাই—নিষ্কাম ভারত!
ধর্মের ভবন চির! দেবযোগ্য দেশ!
ধর্ম-বিভা পৃথিবীরে দিয়েছ নিয়ত,

এবে চন্দ্র সনে প্রভা বিতব অশেষ।”

সহসা দেখিনি, মুক্ত কপোতের মত
উঠিলে অম্বরে, তুমি দ্বিতীয় চন্দ্রমা!
চির জ্যোৎস্না হ’ল ধরা, চির আলোকিত;
অতন্দ্র যুগল-চন্দ্র-অপূর্ষ সুষমা!

BANGLADARSHAN.COM

ধর্মঘর

বাদলরাম হাল্‌ওয়াই—
গরুর গাড়ীর গাড়োয়ান,
ধর্মঘটের মস্ত চাঁই
দেখতেও ঠিক পালোয়ান।
মোটা রকম বুদ্ধিটা, তার
গলার স্বরও মধুর নয়,
কিন্তু যে কাজ করবে স্বীকার—
করবে সে তা সুনিশ্চয়।
ছ' ছ' দিনের ধর্মঘটে
বিকিয়েছে সর্ব্বস্ব তার,
অন্ন মোটে আর না জোটে
তবুও কাজে যায়নি আর!
হোথায় যত সওদাগরে—
কামড়ে মরে নিজের হাত,
হেথায় সে সগোষ্ঠী শুকায়
নাইক পয়সা, নাইক ভাত।
হুঁটা গেল; পত্নী তাহার
দু'দিন আছে উপবাসে,
যুত্বে গাড়ী ব'ল্‌তে গিয়ে,
শিক্ষা ভালই পেয়েছে সে।
শিশুটি তার কাণ্ড দেখে
কাঁদতে যেন গেছে ভুলে,
শান্তমুখী মেয়েটি আজ
ভয়ে ভয়ে নয়ন তুলে।
ছেলে মেয়ের কষ্টে সে যে'
মোটেই ছিল নাক' সুখে,
স্পষ্ট সেটা লেখাই ছিল—
তার সে বিষম কাল মুখে;

BANGLADARSHAN.COM

তারই সঙ্গে লেখা ছিল
হৃদয়ের বল বিলক্ষণ,
বিকট ঘৃণা, বিষম জ্বালা,
সবার উপর—অটল পণ!
ধনীর ধনের উপরে যে
পরিশ্রমের আছে মান,—
যদিও এটা নাই সে জানে
নয় সে তবু ক্ষুদ্রপ্রাণ।
বাদলরাম! বাদলরাম!
গরুর গাড়ীর গাড়োয়ান!
বাদলরাম! বাদলরাম!
দেখতে শূন্যে পালোয়ান!
সূক্ষ্ম নহে বুদ্ধিটা তার,
কণ্ঠস্বরও মিষ্ট নয়;
কিন্তু যে কাজ কর্বে স্বীকার,—
কর্বে সে তা' সুনিশ্চয়।

BANGLADARSHAN.COM

পথে

আমার ধূলায়—এত ঘৃণা;—

আর তুই ধূলা মেখে, গাড়ী খান্ পথে দেখে,
ধরিলি আমারে এসে কিনা!

আশ্রয় লইলি মোর কোলে,

ওরে, তোর নাহি ভয়, ভয়ের এ ঠাঁই নয়,
ধূলা দেছ,—মারিব তা' ব'লে?

শোন্ ওরে পথের বালক,

দূরে চ'লে গেছে গাড়ী, এই বেলা তাড়াতাড়ি
বাড়ী যা' রে, থাকিতে আলোক।

চ'লে গেছে, যাক্—বাঁচা গেল;

আশ্রয় দিলাম ওরে, সে মোর ধুতির' পরে—
চিহ্ন এক রেখে গেল কাল!
সত্য কথা বলিতে কি ভাই,

ধূলা দেখে হ'ল রোষ; কিন্তু তার—কিবা দোষ?
পথই তার খেলিবার ঠাঁই।

দরিদ্রের শিশু সে যে হয়,

কোথায় আঙিনা তার নাচিবার—খেলিবার?
পথে খেলে, ধূলা মাখি' গায়।

বিশ্বগ্রাসী, ওগো ধনিদল!

দরিদ্রের সকলি ত'— করিয়াছ কবলিত,
পথ মাত্র আছিল সম্বল—

ছেলেদের খেলিবার স্থান

তা'ও সহিল না আর, তা'ও কর অধিকার?
গাড়ী, ঘোড়া, আনি নানা যান!

বিভীষিকা দেখায়ে এ সব-
ইচ্ছা কি দরিদ্রদলে, পাঠাইতে রসাতলে?—
ধনহীন-নহে কি মানব?

BANGLADARSHAN.COM

অন্ধ শিশু

শীর্ণ দেহ, শুষ্ক তা'র মুখ,
দৃষ্টিহীন-শিশু এতটুকু;
জন্মেছে সে ভিখারীর ঘরে,
জীবন বহিছে অনাদরে।
পিতা মাতা কেহ নাই-কেহ নাই তার,
সে এখন অপরের সহায় ভিক্ষার।

অন্ধের দুখের নাহি শেষ,
গ্রীষ্মে শীতে একই তার বেশ,-
একই ভাবে সকাল বিকাল,
পথে বসি' কাটায় সে কাল;
কেহ বা দলিয়া যায়,-কেহ বলে 'আহা',
ব্যথিতের দুঃখ, হায়, কে বুঝিবে তাহা!

না জেনে সে বসিল ফিরিয়া,
পথ পানে পিছন করিয়া;-
না জেনে প্রাচীর-পাদ-মূলে,
হাতখানি পাতিল সে ভুলে!
নিষ্ঠুর নগরী ওরে, বিদ্রোপের ছলে,
মনে হয়, বিধি তোরে ভর্ৎসিলা কৌশলে।

BANGLADARSHAN.COM

অবগুণ্ঠিতা ভিখারিণী

ওরে বধু, গ্রাম্য-পথ-শোভা,

আজি কেন নগরীর মাঝে?

কৃষকের গৃহলক্ষ্মী তুই,

বল্ আজি হেথা কোন্ কাজে?

তুই কি বিধবা নিরাশ্রয়া?

স্বামীর স্মিরিতি, শিশুটিরে

বাঁচাইতে, ত্যজি' লজ্জা ভয়-

এসেছিস্ গ্রামের বাহিরে?

অথবা এ কি অভাগিনী

কলঙ্কের নিশানা তোমার?

-ভেবেছিলে বালাই যাহারে,

সান্ত্বনা সে আজি নিরাশার।

কেন বাছা এনেছিস্ শিশুরে ভিক্ষায়?-

কাঁদে ছেলে,-নিয়ে যা',-নিয়ে যা';

জান না?-ভিক্ষায় তুমি এনেছ যাহারে,

পিতা তার নিখিলের রাজা!

BANGLADARSHAN.COM

বিকলাঙ্গী

নগরীর পথে, হায়,
কৌতুকের স্রোতে,
পাতিয়া বিশীর্ণ হাত—
প্রাতঃকাল হ'তে,
বসে' আছে পথে!

মুখে নাহি বাণী, গা'য়
ছিন্ন বাস খানি,
বয়স চৌদ্দের বেশী
নহে অনুমানি,
কুজা অভাগিনী।

মুখ পানে তবু, কা'র'
চাহেনাক' কভু,
যৌবন যদিও আজি
দেহে তার প্রভু,—

চাহেনাক' তবু!

সরম-সঙ্কোচে, তার
সর্ব দোষ ঘোচে;
কুজারে ঘিরিয়া, ফুল—
ফোটে গোছে গোছে!
সরমে-সঙ্কোচে।

BANGLADARSHAN.COM

কুস্থানাদপি

স্বাগত, স্বাগত, বারাজনা!

তুমি কর ভাব-উপদেশ;

সোনা সে সকল ঠাই সোনা,

যাই হ'ক পাত্র, কাল, দেশ।

পীড়া পেলে পথের কুকুর,

হও তুমি কাঁদিয়া বিব্রত;—

ব্যথা তার করিবারে দূর,

প্রাণ চেলে সেবিছ নিয়ত!

উঠিছে সে শ্বসিয়া, শ্বসিয়া,

উর্ধ্বমুখ উদ্গত নয়ন;

শ্বসিয়া-ধ্বসিয়া পড়ে হিয়া—

তোমারো যে তাহারি মতন।

হাসে লোক কান্না তোর দেখে,

ক্ষুণ্ণ-দৃষ্টি-উত্তর তাহার!

এত দিন কিসে ছিল ঢেকে—

এ হৃদয়-উৎস মমতার?

দেখি' তোর ভাব আজিকার—

আনন্দাশ্রু এল চক্ষু ভ'রে,

বুদ্ধ তুমি-খ্রীষ্ট-অবতার,—

দিনেকের-ক্ষণেকের তরে!

BANGLADARSHAN.COM

বন্যায়

বন্যায় গিয়েছে দেশ ভেসে।

বনস্পতি,-পাখিদলে, নিশীথে, জাগায়ে বলে;-

“প্রাণ বাঁচা’-পালা’ অন্য দেশে।

রক্ষা নাই আমার এবার,

এবার হাসিলে হানা, আর আমি টিকিব না,

দেরি তোরা করিসনে আর।”

দেখিতে দেখিতে এল হানা,

বনস্পতি,-গঙ্গাজলে, ছিন্ন মূল,-ভেসে চলে,

তবু তারে পাখীরা ছাড়ে না।

“এখন যা” বলে বনস্পতি;

পাখী বলে “পুণ্য ম’লে- ভেসেছি গঙ্গার জলে”;

সুজনের এই ত’ পীরিতি।

BANGLADARSHAN.COM

দেবীর সিন্দূর

সারা রাত, আহতের মত,
শোকাহত আচার্য্য ভাস্কর,-
নিদ্রাগত-শয্যা বিলুপ্তিত,
তবু ব্যথা জাগে নিরন্তর।

অকস্মাৎ আসিল চেতন,
বক্ষ যেন পূর্বের মতন
শ্বাস যেন পূর্বের মতন
সহজে করে না আনাগোনা।

“আজি দেশে দেবী-মহোৎসব,
ঘরে ঘরে বাদ্য বাজে নানা;
সধবারা সাজিতেছে সব,
বিধবা লীলার তাহে মানা।
আছে লীলা বীজাঙ্ক চর্চায়,
মন যেন শান্তির নিবাস;
সে ধৈর্য্য জানিনা কেন, হয়,
মোর মনে জাগায় তরাস।

মূর্ত্তিমতী শান্তি, মা আমার,
কোনো কথা নাহি তার মুখে;
তবু, তার মুখ চাওয়া ভার
শেল সম বাজে মোর বুকো।

লীলাবতী-সন্ন্যাসিনী বেশে-
করিতেছে দীর্ঘ উপবাস;
পিতা আমি, দেখিতেছি ব'সে,
চোখের উপরে বারমাস!

ডাকি' লহ মোরে যমরাজ!
ডাকি' লহ কন্যা পতিহীনা;

BANGLADARSHAN.COM

পিতা হ'য়ে করিতেছি আজ,
সন্তানের মরণ কামনা!

আজি দেশে দেবী-মহোৎসব,—
এ উৎসব সকল হিন্দুর;
সধবারা চলিয়াছে সব,
পরিবারে দেবীর সিন্দূর;—

ব্রাহ্মণী! এদিকে এস, শোন,
এখনি করিয়া দাও দূর—
মূর্খ—যত দেবল ব্রাহ্মণ,
পর' নাক' দেবীর সিন্দূর।”

BANGLADARSHAN.COM

শিশুর স্বপ্নাশ্রু

দোলায় শুয়ে ঘুমায় শিশু মায়ের কোলের মত,
মায়ের নয়ন নিয়েছে আজ জাগরণের ব্রত!
পল বিপলে, সকাল সাঁঝে, পাঁচটি মাসের স্নেহ,
হৃদয়টি তার ছাপিয়ে দিয়ে ভাসিয়ে দেছে গেহ।
হায় কিশোরী! নূতন খেলা-মানুষ-পুতুল নিয়ে,-
প্রদীপ করে, পলক-হারা, তাই কি আছিঁস্ চেয়ে?
ঘুমায় শিশু, পল্লী ঘুমায়, ঘুমে জগৎ ছায়,
কাজল-কাল চোখের কোণে ঈষৎ হাসি ভায়!
হঠাৎ, কেন চোখ দু'টি তার ছলছলিয়ে আসে,
ঘুমের ঘোরে, শিশুর চোখে, কোন্ দুখে জল ভাসে?
ঝিনুক বাটার ঝন্ঝনা কি নিদ্রা-ঘোরে ও শোনে?
তাই কি কাঁপে ঠোঁট দু'টি তার-অশ্রু চোখের কোণে?
ভয় যে আজো শেখেনিক' মান অপমান নাই,-
কি বেদনায়, ঘুমের ঘোরে, তার চোখে জল ভাই?
শিশুর স্বপ্ন-তা'ও কি নহে সুখের ভগবান?
বিভীষিকার বিষম ছায়া তাতেও বিরাজমান?

BANGLADARSHAN.COM

অধুব

খটের ধারে, বাতাসে দুল্দুল,
দেখেছিলাম একটি ছোট ফুল;—
রবির আলোয় আহ্লাদে আকুল!

চটুল চোখে তারার মত চায়;
হাত-লোভানো মন-ভুলানো তা'য়,
খটের ধারে ছুটেছিলাম হয়।

কত চড়াই, কত না উত্ৰাই,
তবুও তার নাগাল নাহি পাই,
ছিন্ন আঙুল, আকুল চোখে চাই;
এই সে দেখি, যায় না দেখা আর,—
ওই সে পুনঃ, এমনি বারে বার,
এমনি ক'রে কাছে গেলাম তার।

খাড়া পাহাড়—ফাটলে তার ফুল,
শিলার ফাঁকে বাধিয়ে দে' আঙুল'—
বাড়াই বাহু—আবেগ সমাকুল।

হঠাৎ—বায়ু বইল বুরুবুরু,
হৃদয়তলে বিষম গুরুগুরু,
নিখিল যেন দুল্ছে দুরদুরু!

গাছ দেখিনে, শুধু গাছের মূল,—
সাপের মত ঝুলিয়ে দে লাঙ্গুল—
গিরির গায়ে ঘুমেই ঢুলুঢুলু।

শুইয়া পড়ি—ঝুকিয়া পড়ি ধীরে,
পাইনে নাগাল,—রক্ত নামে শীরে,
নিম্নে তিমির, শিলায় দেহ চিরে।

এবার বুঝি ঠেকলরে আঙুল!
হঠাৎ—একি!—প'ড়ল খ'সে ফুল,—
খটের তলে, বাতাসে দুল্দুল।

BANGLADARSHAN.COM

স্থলিত পল্লব

আহ্লাদে বনানী সাজে মুকুলে পল্লবে
বসন্তের সারঙ্গের রবে!
নিবিড় শীতল ছায়,
রাখালেরা ঘুম যায়,
পাখী গায় মৃদু কলরবে;
গাছে গাছে কিশলয়,
নূতনের গাহে জয়,
মৃত্যু জরা পাশরিয়া সবে।

অকস্মাৎ ক্ষুণ্ণ করি' পল্লবের হৃদ,-
ক্ষুণ্ণ করি' বসন্ত সম্পদ,-
স্তব্ধ করি' কলরব,-
পল্লবে জীর্ণ শব
লভিলরে নির্বাণের পদ!
কে জানিত শোভা মাঝে,
মরণের পাংশু সাজে,
একজন পার হয় মরণের নদ?
কাহারো হ'লনা, ক্ষতি, গেল সে লুকায়,
নিভতে বৃন্তটি শুধু উঠিল শুকায়!

BANGLADARSHAN.COM

দুর্দিনে অতিথি

সে দিন হঠাৎ বর্ষা পেয়ে,
কামিনী ফুল ফুটল বনে;
আমি তাহার একটি গুচ্ছ
তুলে নিলাম পুলক মনে।

ঘরে এসেই দোয়াত হ'তে,
লুকিয়ে, ফেলে দিলাম কালি,
দোয়াতের সে ফুলদানীতে
ফুলটি রেখে দেখছি খালি;

জোর বাতাসে, হঠাৎ, ঘরে
তুকল সে এক প্রজাপতি;
রইল রে সে সারাটি দিন,
একলা ঘরের হ'য়ে সাথী।

অতিথ হ'ল আমার ঘরে,
প্রজাপতি আপন হ'তেই;
ঝড় বাদলে, ছাড়তে তারে,
পার্বনাত' কোন' মতেই।

কবাট দিলাম বন্ধ ক'রে,
জানলা দিয়ে দিলাম তাই;
সন্ধ্যা বেলায় প্রদীপ জ্বলে,
ভাবছি ব'সে কত কথাই।

হঠাৎ, উড়ে, আলোয় প'ড়ে,
প্রজাপতির জীবন গেল;—
হায়, অতিথি! নয়ন-জলে,
নয়ন আমার ভ'রে এল।

দুর্দিনের সেই অতিথিরে,
হায়, সুদিনের সুপ্রভাতে,—
আমার স্নেহ—পাথেয় দিয়ে,
পেমাল নারে আর পাঠা'তে।

BANGLADARSHAN.COM

আবার আমি তেমনি ক'রে
অনল-দক্ষ দেহটি তার,
রেখা দিলাম ফুলের' পরে;
ঐকে নিলাম বুকে আমার!

BANGLADARSHAN.COM

গোলাপ

পলে, পলে,—আলোকে, পুলকে,
ভরি' উঠে গোলাপ উষায়;
স্ফুটিত পাপড়ি, দিকে, দিকে,
কচি ঠোঁটে কি বলিতে চায়?
রৌদ্রের সাগ্রহ আলিঙ্গনে,—
বায়ুর চুম্বনে, উষ্ণ শ্বাসে,—
গন্ধ-ধারা সৃজিয়া কাননে,
কৌতুকী সে—হাসে, শুধু হাসে!

অলি আসে—মধু ল'য়ে যায়,
থাকে না সে কাজ সাজ হ'লে,
গোলাপ সে মু'খানি ফিরায়,

শান্তিভরে বৃন্তে পড়ে চ'লে।

রক্তমুখী সন্ধ্যার গোলাপ,
ভাবে বুঝি লাভণ্য বাড়িছে;—
বিষ ঢালে দিনান্তের তাপ,
আর জীবনের আশা মিছে।

নিশি আসে, শিশির নিষেকে—

শক্তি আর ফিরে নাক' তার,

শেষ গন্ধ ক্ষরে থেকে থেকে,

শেষ মধু,—নাহি নাহি আর।

তার পর নিশান্ত বাতাসে,

দলগুলি ঝরি' পড়ে, হয়,

আলোকের তীব্র পরিহাসে,

ধূলি মাঝে গোলাপ লুটায়!

BANGLADARSHAN.COM

কুলাচার

বর এল সূতি-ধুতি-পরা,
গৃহে উঠে হাসির ফোয়ারা,
‘শুনেছি বনেদী লোক,
তাদেরো কি ছোট চোখ—
চেলী কভু দেখে নি কি তারা?’
গৃহে উঠে হাসির ফোয়ারা।

বাক্যপটু জেঠা মহাশয়,—
বর পক্ষে সম্বোধিয়া, কয়,
“সূতি-ধুতি ব্যবহার
এও নাকি কুলাচার?
এমন ত দেখিনি কোথায়!”

হাসি’ কয় জেঠা মহাশয়।
বরের সে পিতামহ শুনি’,
(বর্ষীয়ান্ নিষ্ঠাবান্ তিনি)

কহেন, “বাপু হে শোন,
কাহিনী অতি পুরানো,
পিতৃমুখে শুনেছি এমনি,—
এসেছিল বৃদ্ধ এক মুনি;—

এসেছিল সন্ন্যাসী প্রবীণ
বহুকাল আগে এক দিন;

সেদিন মোদের গৃহে,
বিবাহের সমারোহে,—
দীর্ঘ জটা, কম্বল মলিন,—
এসেছিল সন্ন্যাসী প্রবীণ;—

দেহ গড়—উন্নত শিখর,
দস্ত শ্বেত, হাস্য মনোহর,
দক্ষ প্রায় ‘ধুনী’ যেন

দীপ্তিমান্ দু'নয়ন,
দ্রুত পশে সভার ভিতর;
স্তম্ভিত সকলে যোড়কর।

কহিলা কাঁপায়ে সভাতল,
‘শুভকাজে—এ কি অমঙ্গল
বিধান দিতেছি আমি,
কথা শোন গৃহস্বামী;—
পুরোহিত! কি দ্যাখো, অবাক্!
দক্ষিণায় বসাব না ভাগ।

চীনবাস পোড়াও সকল,
কার্পাস পরাও নিরমল,
ধনী পাদপের দান,—
কন্যা বরে শোভমান;

বৃথা শিরে ল'য়োনা এ পাপ,—
‘ভ্রূণ-জীব হত্যার সস্তাপ।’

মৌন সবে যেন মন্ত্র-বলে,
চীনবাস পোড়ায় অনলে;
নিষ্পাপ কার্পাস বাস,
পুষ্প সম পুণ্য হাস,
কন্যা-বরে করিল প্রদান;
অস্তর্দ্বান সন্ন্যাসী মহান!

সেই হ'তে বংশের গৌরব,
সেই হ'তে সম্পদ বিভব,
সে অবধি এ বিধান—
কুলাচারে অধিষ্ঠান,
সে অবধি সব সুলক্ষণ,
পাপ প্রথা করিয়া বর্জন।”

চমৎকৃত সভামাঝে সবে—
সন্ন্যাসীর পুণ্যের প্রভাবে,

BANGLADARSHAN.COM

কন্যাপক্ষ তাড়াতাড়ি,
কন্যার রেশমী শাড়ী
ছাড়াইয়া, কার্পাসে সাজায়'
নবোৎসাহে নৌবৎ বাজায়!

BANGLADARSHAN.COM

তিলক দান

স্নান সারি' সকাল সকাল,
মিঠায়ে ভরিয়া ছোট থাল,
আপনি চন্দন ঘসি'
চারি বছরের 'উষী'
ফোঁটা দিল, হাসি এক গাল।

দিদি এল পিঠে ভিজে চুল,
উষা-স্নানে শীতল আঙুল,
স্নেহের গৌরবে তার,
মুখে শ্রী ধরে না আর,
মা বলিয়া মনে হয় ভুল!

কার্তিকের প্রভাত বাতাস
এখনো ছাড়িছে হিম-শ্বাস,-
চন্দন-পরশ, শিরে,
জাগায় সে ফিরে, ফিরে,-
জাগায় সে স্নেহের আভাস!

আছি মোরা দুয়ারে দাঁড়ায়ে,
পূর্ণ পথ-ছোট বড় ভায়ে;
-আকুল তৃষিত চোখে,
মলিন-বয়সে শোকে,
মুখপানে কে গেল তাকায়ে?

জড়সড়-শীতে করি' স্নান,
পরিধান-ধুতি পিরিহান,
শুভ্রকেশ-যত্নহীন-
কোথা যাও হে প্রাচীন?
তুমিও কি মোদেরি সমান?

BANGLADARSHAN.COM

বর্ষীয়সী ভগিনীর গৃহে,
চলেছ কি স্নেহের আগ্রহে?
অথবা, অভ্যাস বশে,
অতীত মৃতের দেশে,
খুঁজিয়া ফিরিছ সেই স্নেহে?
এস, এস, মোদের পুলক—
পুনঃ তোমা করিবে বালক!
ক্ষুধিত ললাটে তব—
মোরা দিব—মোরা দিব;—
স্নেহদান—চন্দন—তিলক।

BANGLADARSHAN.COM

শিশুর আশ্রয়

ননীর গড়ন শিশুটি;
মা তাহার এক বেনিয়ার দাসী,
দিতে রাতে কাজ-নাই ছুটি;
শিশু-কাছে কাছে থাকে,
জল ঘাঁটে, কাদা মাখে,
ছুটে আসে শুনে মা'র স্বর;-
কবে অবসর হবে,
কবে তারে কোলে নেবে,
পাবে ছেলে মায়ের আদর।

ট'লে ট'লে চ'লে যায়,
মা'র মুখ পানে চায়,
ট'লে ট'লে কাছে আসে ফের,
কাজে যেন ব্যস্ত কত,
হাত নাড়ে মা'র মত,
গিয়ে তার কাছেতে মুখের।

মা তার উঠিবে যেই,
ছেলের আঙুল সেই,-
চোখে লাগে, দেখে অন্ধকার;
অমনি শিশুর পিঠে,
পড়ে চড় দু'চারিটে,
কাঁদে শিশু করি' হাহাকার।

ভয়ে ধেয়ে মা'রই কাছে গেল সে পাগল!
মার খেয়ে-আগে ভাগে পেলে শিশু কোলে।

হাসি-চেনা

ওরে দিদি, দেখি, দেখি—একবার আয়,

ওই দুষ্ট হাসি যেন দেখেছি কোথায়!

যে বুড়া হয়েছি আমি ভাই,

সব কথা ভুলে ভুলে যাই।

ওই যে চতুর হাসি সরল প্রাণের,

ও যেন রে কর্তব মধুর গানের;

হয়েছে,—ও হাসিটুকু, ভাই,

যা'র ছিল, সে-ও আর নাই।

থাকিলে কি হ'ত বলা নয়ক' সহজ,

তো'তে আর তা'তে গোল বাধিতই রোজ;

আর মনে তার ঠাই নাই,—

সে টুকু তোদেরি দি'ছি ভাই।

অতীতের তরে শোক?—আমার ত নাই;

যা'রা গেছে, আমি দেখি, তোরাও তারাই!

ভুল হ'য়ে যায় সব ভাই,

বুড়া আমি—তাই ভুলে যাই!

কচি হ'য়ে ফিরে আসে আমাদেরি মুখ,

আমাদের যৌবনের যত ভুলচুক,

চলা ফেরা, সব—চেনা, ভাই।

চেয়ে, চেয়ে, দেখি শুধু তাই।

যা'রা গেছে—কোথা হ'তে তাদের সে হাসি—

প্রত্যহ নূতন মুখে ফুটে রাশি রাশি!

কৌতুকে রয়েছি ভাল, ভাই,

দ্যাখ—আর বুড়া আমি নাই!

BANGLADARSHAN.COM

বর্ষীয়ান

নগরীর সঙ্কীর্ণ গলিতে—
পরিচ্ছন্ন পুরানো কুটীর;
এক দিন সে পথে চলিতে
কুটীরেতে দেখিনু স্থবির।
আপন বলিতে, এ জগতে,
কেহ আর নাহি সে বুড়ার,
তাই, যা'রে পথে দেখে যেতে,—
ডেকে বলে, যত কথা তার।

‘টোটা’র বারতা শুনি’ যবে,
দেশে দেশে অসংখ্য সিপাহী,—
কলহ করিয়া কলরবে,
দলে, দলে, হইল বিদ্রোহী;—
অরাজক, হত্যা, অত্যাচার,
লুটপাট, বীভৎস ব্যাপার;—
সেই কালে বহু ‘রোজগার’
ঘটেছিল অদৃষ্টে বুড়ার।

দিন কত খুব ধূমধামে—
কাটে কাল, আমোদে হেলায়,
অটহাসি যেথায় ত্রিয়ামে,
সেথা হ’তে কমলা পলায়।
তার পর ব্যবসা জুয়ায়,
সম্পত্তি বিস্তর গেল তার;
মরে’ গেল পুত্র দু’টি হায়,
পত্নী গেল—ঘুচিল সংসার।

“ঋণগ্রস্ত, বৃদ্ধ, অসহায়,
পুত্রহীন, সম্পদ-বিহীন,—
প্রতিবাসী—হেন দুর্দশায়,

ফিরে নাহি দেখে একদিন!
গঙ্গাস্নানে যদি কভু যাই,—
রুগ্ন আমি, ঘটেনা প্রত্যহ,—
সমুখে যা' পায়—লয় তাই,
বলিবার নাহি মোর কেহ;
বলিলে মারিতে আসে সব,
নহি তবু তা'দের প্রত্যাশী,
চোর হ'য়ে আছি কি যে ক'ব
এমনি সুজন প্রতিবাসী!

বুড়া আমি মোর'পরে এত উপদ্রব"—
কহে বৃদ্ধ, অকম্পিত—উর্দ্ধ-নেত্রে চাহি,—
“ভগবান্ তুমি ইহা দেখিতেছ সব,
চাহিয়া তোমার মুখ এত আমি সহি!”
অত্যাচার, অন্যায়ের বারতা শুনিয়া,—
স্বার্থপর দর্পিতের শূনি' বিবরণ,—
বিশ্বাসী সে নিঃসহায় বৃদ্ধেরে দেখিয়া,—
মনে হয়—আছ তুমি—আছ ভগবান্!

BANGLADARSHAN.COM

অরণ্যে রোদন

ঘেসেড়ানি চলে' গেছে জল খেতে নদে,
একা-মাঠে শিশু তার কাঁদিছে বসিয়া,
দ্বিপ্রহর-নিরজন,-ক্ষীণকণ্ঠ কাঁদে,-
অপরূপ শব্দ-মায়া বাতাসে সৃজিয়া!

কাছে আসে প্রজাপতি,-নেমে আসে সুর,
আবার বাড়িয়া উঠে;-বাতাসের বেগে
পতঙ্গ পলায় যেই-দূর হ'তে দূর;
বিশ্বে আজি-কান্না শুধু উঠে জেগে, জেগে!

হাতে এসে মনোজ্ঞ সে পতঙ্গ পলায়,
কান্না সে ত' চিরসার্থী-আছেই সমান,
বাড়ে কমে?-সত্য বটে; থামেনা রে হয়,
হায় রে একান্ত একা শিশুর পরাণ!

কখন্ থামিবে কান্না,-আসিবে জননী,
ফুরা'বে বিজন বাস-জুড়াবে পরাণী।

BANGLADARSHAN.COM

দেবতার স্থান

ভিখারী ঘুমায়েছিল মন্দিরের ছায়ে;
সহসা ভাঙিল ঘুম চীৎকার ধ্বনিতে,
জাগিয়া, চাহিয়া দেখে, পূজারী দাঁড়ায়ে,—
গালি পাড়ে, ক্রোধে যায় ধাইয়া মারিতে।

বিস্ময়ে ভিখারী বলে, “গৌসাই ঠাকুর!
বুঝিতে না পারি মোরে কেন দাও গালি,
ভিক্ষা মেগে ফিরিয়াছি সারাটি দু’পুর,
শান্ত বড়, তাই হেথা শুয়েছি নু খালি।”

রুঘিয়া পূজারী কহে, “চুপ্ বেটা চোর—
নীচ জাতি,—জাননা এ দেবতার ঠাই?
মন্দিরের অভিমুখে পা’ রাখিয়া তোর—
এটা হ’ল আরামের ঠাই—কি বলাই!”

সে বলে, “পা’ ল’য়ে তবে কোথা আমি যাই,
এ জগতে সকলি যে দেবতার ঠাই।”

BANGLADARSHAN.COM

মেঘের বারতা

নীল-মেঘপুঞ্জ হ'তে শৈত্যের বারতা
আসিছে, তাপার্ভ, ক্লিষ্ট ধরণীর, 'পরে,
আচম্বিতে জলে, স্থলে, কাননে, অম্বরে,
বর্ষণে ধনিয়া উঠে চর্চরিকা গাথা!

কাঁপে তরু, পুলকে আপ্লুত পুষ্পলতা;
বৃষ্টি-ধারা উঠে নাচি' বায়ুর প্রহারে,
বাতাহত-বর্ষাহত-শ্যাম সরোবরে
সু-যৌবনা শ্যামাঙ্গীর লাবণ্য গৌরতা!

কালোতে বিকাশে আলো, মৃগালে কমল,
শ্যাম পত্র-পুটে ফুটে সোনার মঞ্জরী,
তীর-বনচ্ছায়া-নীল, শ্যামল, কোমল,
বৃষ্টিপাতে-সরসীর বিকাশে মাধুরীর।
নীল মেঘ হ'তে আসে শান্তির বারতা,
ধরায় লাবণ্য আনে অমরার কথা!

BANGLADARSHAN.COM

অপূর্ব সৃষ্টি

স্বধর্ম্মে স্থাপিলা যবে সৃষ্টিরে বিধাতা,
(প্রতাপে তপনে যথা,) অদৃষ্ট আসিয়া
নিভূতে মদনে ডাকি' কহিল বারতা;
বাহিরিল চুপে চুপে দু'জনে হাসিয়া।

কুহেলি সৃজিয়া তারা মাখায় তপনে,
তপন হিমাংশু হ'ল; হেথা পুনরায়
নৈশ মেঘে চন্দ্র-ধনু রচিল গোপনে;
কেবা সূর্য্য-চন্দ্র কেবা-চেনা হ'ল দায়!

শুধু তাই নয়, রৌদ্র সৃজিয়া শশীর,
পূর্ণিমার শুরু মেঘে করিল স্থাপন;
বিরহে মিশায়ে দিল স্মৃতি পিরীতির,
মিলন কল্পিত ভেদ করিল রোপণ!

শাপ দিলা অন্তর্যামী অদৃষ্ট-মদনে,
'প্রভু হ'য়ে হ'বে দাস মানব-সদনো'

BANGLADARSHAN.COM

‘বাতাসী-মা’র দেশে

তুলোর মতন পাখার ভরে
কোন্ ফুলের বীজ উড়েছে?
কোন্ দেশেতে জনম লভি’
কোন্ বিজন গায় ছুটেছে?

ছেলেরা যেই ধরতে ধায়,
অমনি উঠে হাওয়ায় হায়,
কেউ বলে সে চাঁদের সূতো
জ্যোৎস্না-স্রোতেই লুটেছে!

কেউ বলে ও ‘বাতাসী মা’র;—
কোন্ বিজন গায় ছুটেছে।

সবাই মিলে উঠলো ব’লে শেষ,
আমরা যা’ব বাতাসী মা’র দেশ!

যেদেশে লোক স্বপন ভরে,
বাতাসে বীজ বপন করে,
বাতাসে হয় সোনা-ফসল,
সোনার চেয়ে দেখতে বেশ!

আজকে মোরা সেই দেশেতে যা’ব,
আজকে যা’ব বাতাসী মা’র দেশ!

তুলোর মতন লঘু পাখায়,
বায়ু ভরে বীজ উড়ে যায়,
হাওয়ার মাঝে বপন, রোপণ,
হাওয়ার মাঝে ফসল শেষ!

আজকে মোরা সেই দেশেতে যা’ব,
আজ যা’ব রে বাতাসী মা’র দেশ!

BANGLADARSHAN.COM

জীর্ণ পৰ্ণ

সূৰ্য্যের কিরণ করি' আড়
দিব্য এক টগরের ঝাড়;
আকাশে বাড়িয়া উঠে বেলা,
ছেলেরা ছাড়া তবু খেলা,
বুড়াদের ভাঙোনাক' জাড়।

পথে যেতে প'ড়ে গেল চোখে,
টগরের পল্লবের ফাঁকে,—
কি এক সামগ্রী মনোলোভা,—
বিস্ব ফল জিনি তা'র শোভা—
রক্ত—যেন অঙ্গুরার স্বর্ণ অলঙ্ককে

কাছে গিয়ে, দেখিনু যা' শেষে
কৌতুকে একাই উঠি হেসে;
সে নহে অমৃত-ফল, হয়,
জীর্ণ পাতা, রৌদ্রে স্বচ্ছ প্রায়,
জীর্ণ তবু পূর্ণ যেন রসে!

তার কাছে সরস পল্লব,
কান্তিহীন, দীপ্তিহীন, সব;
এ জীর্ণ পল্লব মাঝে, আজ,
সুস্থ, পুষ্ট, পত্রে দিয়া লাজ,—
বিকশিত সবিতার কিরণ-গৌরব

BANGLADARSHAN.COM

অক্ষয়-বট

জন্ম তব সত্যযুগে হে অক্ষয়-বট,
শাস্ত্রে কহে, সত্য কি? কহ তা' মোরে তুমি
বড় সাধ মনে, যেতে তোমার নিকট,
ধন্য সে, চক্ষু যে হেরে তব পীঠ-ভূমি।

ভাসিলা কি নারায়ণ তোমারি পল্লবে?
পিণ্ড দিলা সীতাদেবী তোমারি সাক্ষাতে?
বিদ্বার্থ দেখিলা তোমা'—আর ভিক্ষু সবে?
বিক্রম বেতালে লভে—সে কি ও শাখাতে?

বল মোরে বিবরিয়া ছদ্মবেশ রাখি'
পূর্ব কথা,—সর্বতাপ যে কথায় ভুলায়;
ভূত সাক্ষী তুমি শাখী; কতই না পাখী
যুগে যুগে পাখি তব বেঁধেছে কুলায়!

সময়-সাগর-জলে মগ্ন অতীতের
তুমি মাত্র চিহ্ন শাখী, পূর্ব ভারতের।

BANGLADARSHAN.COM

শিশুহীন পুরী

সলিল-আলয়ে রাঙা শিখা ল'য়ে
আজিও রয়েছে কমল-কলি;
এ হেন শিশিরে হয়, কা'র তরে,
জলে উঠে নিতি অনল জ্বলি'!
তাম্বুল রসে রাঙায়ে রসনা
সোণামুখী বন-জবার হাসি-
ফুটিল আবার বনে বনে ওই,
আজ কে দেখিবে তা'দের আসি'?
কলায়ের সঁটে প্রজাপতি ফুটে,-
প্রজাপতি লুটে বেড়ায় খালি;
নারিকেল শিরে বেজে ওঠে ধীরে
শত জোড়া ছোট হাতের তালি!
কাঠ-বিড়ালেরা মুখে মুখে করে
ঘুরনি ঘোরার হরষ-ধ্বনি;
কাছিমেরা দেয় রোদে গা-ভাসান,
শালিকেরা ফেরা ফড়িং চুনি'।
লাল নীল ক্ষুদে জাড়ে আঁখি মুদে
হ'য়ে যায় হয় শুকায়ে সাদা,
ঘাটের ফাটলে লুটায় চামর,
রাশি রাশি ফুটে সোনার গাঁদা।
বনের কুসুমে আদর করিতে
নাহি কেহ, নাহি শিশুর হাসি;
বনে, ফুলে, ফলে, ছায়া-তরু-তলে,
শুধু বিফলতা বেড়ায় ভাসি'।
বিজন এ পুরী শিশুর অভাবে
কে যেন জীবন লয়েছে কাড়ি',
হরষ বিথার নাহি যেন আর,
পুলক-দেবতা গিয়াছে ছাড়ি'!

পথহারা

আকাশ পানে চেয়েছিলাম, ছিলাম করজোড়ে,
একটা কিছু মনের মাঝে তুলেছিলাম গ'ড়ে;

আকাশ পানে চেয়েছিলাম,
স্বাতীর জলে নেয়েছিলাম!

হর্ষে ছিলাম, হঠাৎ চোখে প'ড়ল ধূলা এসে,
ছায়াপথটি হারিয়ে গেল, - অশ্রুজলে ভেসে।

দেখি, - প্রথম পারিনিত' চাইতে কোনোমতে, -
ছায়াপথটি হারিয়ে গেছে সাদা মেঘের স্রোতে;

আকুল হয়ে দিক্ ভুলেছি,
বুকের মাঝে গোল তুলেছি,

কে-ছায়াপথ চিনিয়ে দেবে, ছিনিয়ে ছায়া হ'তে?

পরাণ-পাখী-ফিরবে কিরে মেঘের রচা পথে?

কে জ্যোতি-পথ দেখা'বে হয়, দিব্য-রথে ল'য়ে?
ভেসে যাবে মেঘের ফেনা কোন্ সে বাতাস ব'য়ে?

নীরব নিশি, ভাবছি একা, -

আজও কার' নাইক দেখা,

পরাণ-পাখী ফিরবে নাকি তারার রচা পথে?

তোলাপাড়া এই শুধু, হয়, সেদিন সন্ধ্যা হ'তে।

BANGLADARSHAN.COM

নাভাজীর স্বপ্ন

‘ডোম’ বলি’, ফিরাইয়া মুখ, চলে’ গেল পূজারি ব্রাহ্মণ,
নাভাজী নমিতেছিল গোবিন্দে তখন;
দু’টি ফোঁটা অশ্রুজলে, মন্দির-সোপান,
সিক্ত হ’ল; সে দিন সে আর, পথে যেতে গাহিল না গান।

কাটা বেত, চেরা-কাঁচা বাঁশ, কুটীরে দুয়ারে স্তূপাকার,—
অন্য দিন পরিতৃপ্ত হ’ত গন্ধে যা’র,
আজ তারে কোনো মতে পারিল না আর
বাঁধিবারে; দেখিল না চেয়ে আপন হাতের দ্রব্য-ভার।

কুটীরের রুদ্ধ করি’ দ্বার ভূমিতলে রচিল শয়ান,
রাঁধিল না, খাইল না, করিল না স্নান;
ধীরে-তন্দ্রা এল চোখে, মগ্ন হ’ল মন;

দেখিল সে অপূর্ব স্বপন,—ইষ্টদেব শিয়রে আপন!

“হে নাভাজী! ক্ষুণ্ণ কেন মন?” জিজ্ঞাসিলে গোবিন্দ তখন,
“কর বৎস হরিদাস কবীরে স্মরণ,
সে সব ভক্তের কথা করহ প্রচার,
ব্রাহ্মণের দর্প হবে দূর,—ঘৃণা কা’রে করিবে না আর।”

BANGLADARSHAN.COM

‘রম্যাণি বীক্ষ্য’

ফাগুন নিশি, গগন-ভরা তারা,
তারার বনে নয়ন দিশাহারা;
কে জানে আজ কোন্ স্বপনে
উঠেছে চাঁদ আন গগনে,
তারার গায়ে চাঁদের হাওয়া লেগেছে!
পেয়েছে সব চাঁদের যেন ধারা!
আন্ গগনের চাঁদ,
যেন হেথায় পানে ফাঁদ;
আর নিশীথের আলো—
আজ হেথায় কিসে এল?
আরেক সাঁঝের গান,
ফিরে জাগায় যেন তান;
তারার বনে পরাণ হ’ল সারা!
এ যেন নয় গান,
এ যেন নয় আলো,
তবু দোলায় কেন প্রাণ,
তবু কেমন লাগে ভাল,—
মন যে মগন তা’তে,
ফাগুন-মধু-রাতে,
মন চিনেছে আকাশ-ভরা তারা,—
পেয়েছে আজ চাঁদের যা’রা ধারা!
বিচিত্র ওই আকাশ
দেয় নূতন কত আভাস,
উষার আলো বাতাস—
যেন, শেফালিকার সুবাস—
যেন, তারার বনে লেগেছে,
চোখে আমার জেগেছে;—
মূক্ত রে আজ মর্ত্য-ভূবন-কারা!
তারার বনে মন হয়েছে হারা!

BANGLADARSHAN.COM

সন্ধ্যা-তারা

(কীর্তনের সুর)

অয়ি মৃদুলোজ্জ্বল তারাটি,
মম জীবন-সন্ধ্যা-গগনে,
অয়ি দিব্য-কিরণ-ধারাটি,
কত শান্তি বিতর ভুবনে।
যবে নিদাঘ-সমীর-নিশাসে—
তুমি অমনি আসিয়া,
যাতনা জুড়াও—
শান্ত শীতল কিরণে;—
মম জীবনে সন্ধ্যা-মগনে;
যবে ধূলায় ধূলায় মিলিয়া,
ঘন আঁধারে আসে গো ঘিরিয়া,
আসি আকুল পরাণে
তোমারে দেখিতে
নীলিম নিথর গগনে,
মম জীবনে-সন্ধ্যা-লগনে!
তুমি নিরাশার মেঘে ডুবোনা,
তুমি প্রলয়ের ঝড়ে নিবোনা,
শুধু অমনি আসিয়া,
হাসিয়া, হাসিয়া,
অমিয় ঢালিয়ো পরাণে;—
মম জীবন-সন্ধ্যা-গগনে!

BANGLADARSHAN.COM

অমৃত কণ্ঠ

শুনেছি, শুনেছি কণ্ঠ তব
পুনঃ, আজি বহুদিন পরে,
প্রাণে মনে জেগেছে উৎসব,
রোমাঞ্চ সকল কলেবরে!
উৎকর্ণ, উদ্গ্রীব হ'য়ে আছি, আবার শুনিতে ওই স্বরে!

নিশান্তের শুকতারা সম
পরিপূর্ণ লাবণ্যের রসে,
সঙ্গীত তোমার, নিরুপম!
হর্ষ-ধারা অন্তরে বরষে;
দিবসে কোথায় ডুবে যায়, অতি ক্ষীণ, অতি মৃদু যে সে।

পূর্ণ, পুষ্ট মন্দার মুকুল,—
নন্দনের লতাচ্যুত হ'য়ে,
তোমার ও সঙ্গীতে আকুল,—
অঙ্গে মোর পড়িল লুটায়,
প্রথম পাপড়ি যে সময়ে, এলায়ে পড়িবে মধুবায়ে।

ও সঙ্গীত আঙুরের ফল,
মৃদুকায় রসের ব্যথায়,
অধরের পীড়নে কোমল
ভেঙে পড়ে, একটি কথায়;
বিন্দু—দুই, স্নিগ্ধ, সুমধুর রস দিয়া—মিলায় কোথায়।

বর্ষাণান্তে মুক্তাফল সম,—
পল্লবাগ্রে যাহা শোভা পায়,—
সন্ধ্যাসূর্য্য,—যাহে অনুপম
সপ্ত বর্ণে—লীলায় সাজায়—
সে যেন গো তোমার সঙ্গীতে, লয় দিয়া সলিলে মিলায়!

স্বাতী হ'তে বারি' যে শিশির
মহামণি হয় সিন্ধুতলে,
তুলনা সে-আজি এ নিশির
অঙ্ককারে যে সুর উথলে;-
আনন্দ-চঞ্চল করি' মোরে, আকুল করিয়া তারাদলে।

জননীর চিস্ননের মত
ও সু-স্বর, পবিত্র, কোমল,-
মন্ত্রপূত আশীর্বাণী-যুথ,
হর্ষ-স্নিগ্ধ যেন শান্তিজল;
সদ্য-বরা শেফালি পরশে, হ'ল যেন শরীর শীতল!

নক্ষত্র জানিত যদি গান,
ভাবিতাম গাহিতেছে তা'রা;
বাণীর বীণার মধু তান!
অমরার-অমৃতের ধারা!
তারার পরশ বুঝি পাও,-তাই গাও হ'য়ে আত্মহারা!
আঁখি কভু দেখেনি তোমায়,
হে অনন্ত-আকাশ-বিহারী;
ফের' তুমি তারায়, তারায়,-
নক্ষত্রের কূলে কূলে, মরি,
পক্ষ্ম যেন আঁখির পলকে,-আঁখির পলকে যাও সরি'।

বড় সাধ, শিশুকাল হ'তে,
হে সুকণ্ঠ! চিনিতে তোমায়;
পাইনি সন্ধান কোনো মতে,
পাইনি তোমার পরিচয়;
কত জনে সুধায়েছি নাম-বলিতে পারে না কেহ, হয়!

সুধায়েছি কবিজন পাশে,
সুধায়েছি কৃষক-বধুরে;
কেহ শুনি' অন্তরালে হাসে,
কেহ হয় চলে' যায় দূরে;

কোন্ দেশে জনম তোমার? কি বা নাম-কে বলিবে মোরে?

নাম তব থাক, নাহি থাকে,
ডাকিব 'অমৃত-কণ্ঠ' ব'লে;
ভালবেসে যে যা' ব'লে ডাকে,
তাহাতেই পরাণ উথলে;
হে অমৃত-কণ্ঠ! পাখী মোর, তোর গানে চক্ষু ভরে জলে।

গান-তব শোনে বহু জনে,
না থাকে বা থাকে পরিচয়;
শুনেছি হে, ওই গান শুনে,
গর্ভশায়ী শিশু স্তব্ধ রয়;
যতদিন নাহি এস ফিরে, ততদিন ভূমিষ্ঠ না হয়।

গাও, তবে, গাওহে আবার,
হর্ষ-শিশু লভিবে জনম!
সুধাপায়ী! চন্দ্রিকা উদকার
কর পুনঃ স্নিগ্ধ মনোরম;
কোকিল পাপিয়া চাতকেরা স্তব্ধ হ'ল, গাও নিরুপম

যাহা কিছু মনোজ্ঞ-মধুর,
যাহা কিছু পবিত্র-সুন্দর,
যত আছে ঈষ্পিত-সুদূর,
-চির মুগ্ধ আমার অন্তর-
বলে, পাখী শীর্ষে সবাকার-হরষ-আপ্লুত ওই স্বর।

বহুদিন, বহুদিন পরে,
পাখী-তোর পেয়েছি রে সাড়া!
বহুদিন, বহুদিন পরে,
প্রাণ মোর পেয়েছে রে ছাড়া!
সাড়া দেছে অন্তরের বীণা, গানের স্পন্দনে পেয়ে নাড়া!

আজ, পাখী, সাধ হয় ফিরে,
ফিরিবারে তারায়, তারায়;-

ব্যগ্র চোখে, সমুন্নত শিরে,
ছেড়ে যেতে পুরানো ধরায়;—
বাঁশীর একটি রন্ধ খুলি', নিঃশেষিতে সঙ্গীতে তুরায়।

তার পর, নৈশ অন্ধকারে,
তোর মত যাব মিলাইয়া;
কাজ নাই আনন্দ ঝঙ্কারে,
চলে' যাব শুষ্কিরে গাহিয়া;
যাহা গাই,—তোর মত যেন, যেতে পারি পুলক ঢালিয়া।

তার পর, কে চিনে না চিনে,
রাখিব না সন্ধান তাহার;
কণ্ঠ যদি পূর্ণ হয় গানে
তোর মত গাহিব আবার
বেশীক্ষণ রহিব না আমি, গান শেষে রহিব না আর।

হে অমৃত-কণ্ঠ! হে সুদূর!
মূর্ত্তিমান্ সুর! সুধাধার!
কণ্ঠ মোর করছে মধুর,
কর মোরে সঙ্গী আপনার,
গান গেয়ে, উল্লাসে উড়িয়া, দিব মোরা অসীমে সাঁতার!

বেদনার বন্ধনের পারে,
চল, পাখী, লইয়া আমায়—
কষ্ট,—যেথা, ফিরে না শিকারে,
সব ব্যথা সঙ্গীতে ফুরায়;
বাঁশীর একটি রন্ধ খুলি'—সব গান শেষ হ'য়ে যায়।

কর মোরে, অতনু-সুন্দর!
পরিপূর্ণ সঙ্গীতের রসে;
এই মহা তমিস্র-সাগর
আসে যেন সঙ্গীতের বশে;
তারার জনম দিয়া গানে, দীপ্ত কর এ বিজন দেশে।

অন্ধকারে পথভ্রান্ত জন,
পায় যেন সঙ্গীতে আশ্বাস;—
ঘুচে যেন প্রাণের ক্রন্দন,
ফেলিতে না হয় দীর্ঘশ্বাস,—
অন্ধকারে পায় দেখিবারে—জ্যোতির্ময় আপন নিবাস!

মুক্তি—শিশু—জন্মোনি এখন’
আছে কোন্ গানের প্রত্যাশে!
পাখী! পাখী! তোমার মতন
গান মোরে শিখাও হে এসে!
মুক্তি-শিশু আসুক জগতে,—পূর্ণ হ’ক ত্রিলোক হরষে!

BANGLADARSHAN.COM

মমতা ও ক্ষমতা

পক্ষি-শাবকেরে বটে সেই স্নেহ করে,-
দৃঢ় মুষ্টি-বলে যার কাল ফণী মরে;
নহিলে বৃথা সে স্নেহ,-শুধু মনস্তাপ;-
মমতা-ক্ষমতা বিনা, উন্মাদ প্রলাপ।

BANGLADARSHAN.COM

নামহীন

বর্ষাশেষ, সুপ্রভাত প্রসন্ন আকাশ,-
মহাদ্যুতি ইন্দ্রনীল মণির মতন;
জলে, স্থলে, ফুলে, ফলে লাভণ্য-বিকাশ,
পথ, ঘাট, সব-যেন সবুজে মগন।

পুরানো প্রাচীর খানি সবুজে সবুজ!
আর তারে কে বলে কঙ্কাল-সার আজ?
দেখরে নিন্দুক তোরা দেখরে অবুঝ,
লাভণ্যের বন্যা-মর্ত্ত্যে-নন্দনের সাজ!

অতি ছোট ছোট গাছ-ছেষেছে প্রাচীর,
নেচে উঠে স-পল্লব আকুল উল্লাসে,
রৌদ্র-ঝিলে করে স্নান, নত করি' শির,
পাখি সম;-বিচঞ্চল মৃদুল বাতাসে।

বল্ ওরে ছোট গাছ তোদেরে সুধাই,
নাম কি রে-নাম কি রে-নাম কি তোদের?
“নাই নাম, আমাদের নাম নাই, ভাই,
হর্ষে আছি,-হর্ষ দি'ছি-এই,-এই ঢের!”

BANGLADARSHAN.COM

আকাশ প্রদীপ

অন্ধকারে জ্বলে ক্ষীণ আকাশ-প্রদীপ,
কতক্ষণ-আছে আয়ু-কতক্ষণ আর?

হিম-সিন্ধু মাঝে রচি' ক্ষুদ্র মায়া-দ্বীপ,
সে কেবল রশ্মিটুকু করিল বিস্তার!

BANGLADARSHAN.COM

শাহারজাদী

কল্পনা-নগরে কত কবিতা সুন্দরী,
আনন্দে করিত বাস; সহসা একদা,
কহিলেন লোকেশ্বর, তূর্য্যধ্বনি করি’
“সেই আমি নিত্য নব অনিন্দ্য প্রমদা।”

আনন্দে লাগিল দিতে যত পুরবাসী
কন্যা নিজ; কে জানিত দিনেকের তরে
সে সম্পর্ক? পোহাইলে বিবাহের নিশি
কে জানিত, যা’বে তা’রা স্বপনের পুরে!

ভয়ে নাহি আর কেহ করে কন্যাদান
লোকেশ্বরে; পরিণাম জেনেছে সকলে;
ফিরিয়া এসেছি তাই ভবনে আপন,

মানসী কন্যারে মোর কহি’ অশ্রুজলে;—
যা রে বাছা! লোকেশ্বরে কণ্ঠে দেহ’ মালা
শাহারজাদীর ভাগ্য লভ’ তুমি বালা!

॥সমাপ্ত॥